


INTRODVCTION
POVR PARVENIR
A LA VRAYE CON-
noissance de la Chirurgie
dogmatique.

Par M. Philippe de Flesselles, docteur Re-
gent en Medecine  Paris.

AVEC VNE APOLOGIE
pour les Chirurgiens.

Et plusieurs Paradoxes en forme d'Aphorismes
tres-utiles pour la pratique de Chirurgie.

Aussi vn traité pour la Conduite de la Chirurgie
UROLOGIQUE




30939

A PARIS,

Chez PIERRE TRICHAR, tenant sa
boutique sur le Pont Neuf, deuant la
Samaritaine.

M. DC. XXV.



A. L. A. I. R. A. N. E. C. O.
non incidebat
aliquando

non incidebat
aliquando

A. L. A. I. R. A. N. E. C. O.
non incidebat

A. L. A. I. R. A. N. E. C. O.
non incidebat

A. L. A. I. R. A. N. E. C. O.
non incidebat

30033

PARIS

non incidebat
aliquando

M. D. C. C. X. X. X.



AMPLISSIMO, ET
 Christianæ Philosophiæ studio-
 sissimo Odeto Colligneo, Car-
 dinali à Castellione, Philippus
 Flessellius medicus, Salutem.

DEDITAVI plurimum, nec
 abs re, an libellum in gra-
 tiam candidatorum Chi-
 rurgie à me conscriptum,
 dignitati tuæ nuncuparem, Cardinalis
 amplissime. Dubitandi autem ratio ea
 potissima fuit, quòd cum omnem tuam
 industriam & laborem sanctis Biblio-
 rum arcanis perscrutandis magna ani-
 mi perseverantia deoveneris, coniecta-

A ÿ

bam non facile tibi esse animum tuum
ad rem tam exiguam demittere, cui om-
nes horæ ad res magis serias vix suffi-
ciunt. Verum, nota mihi longo usu tua
humanitate persuasus, illum Ce'studi-
ni tue statui offerendum, qui viam
quandam ad arcanorum naturæ notio-
nem (veluti compendio) instruit, quo
nomine Christianam mentem volupta-
te afficere potest. Si enim natura vis est
diuina rebus creatis indita, atque ideo
veluti liber digito Dei conscriptus, ad
inuisibilia Dei (vt Pauli sermone
vtar) perscrutanda aditum facere cen-
seri debet, omnis quæ de natura susci-
pitur contemplatio. Deduc igitur ad
hanc nostram tenuitatem animum tuum,
& boni consule quod offerimus, maxi-
ma animi nostri propensione ad obse-
quia tua vniuersa. Vale.



INTRODVCTION A LA CHIRURGIE DOGMATIQUE.



L'ART de Medecine, en general comprend cinq parties: lesquelles par faute de plus conuenables noms sont nōmees Physiologie, Aitiologie, Simiotice, Hygieine, & Therapeutique, qui sont noms deriuez du Grec. La derniere d'icelle est subdiviſee en

trois, c'est à sçauoir Dietetique, Pharmaceutique, & Chirurgie, qui signifient curation par alimens, par medicamens, & par operation manuelle. Icelle chirurgie en antiquité & certitude surmonte les autres parties de la Medecine. De laquelle si nous voulõs sçauoir la definition proprement ou estroitement prinse, il est facile à respõdre, que c'est vne partie de Medecine curant les maladies par operation manuele, comme par sections, vstions, & semblables. Et par ce que les auteurs de la Chirurgie font mention d'vne autre acceptation d'icelle, qu'ils appellent largement prinse, il la faut definir ainsi qu'il s'ensuit.

Chirurgie, est vne science qui instruit l'entendement humain à

curer les maladies, principalement par œuvres manuelles, sans obmettre diète & pharmacie, entant qu'elles cooperent à l'operation manuelle. Ce qui est entendu seulement aux maladies chirurgicales, & qui sont de la contemplation de chirurgie. Sur icelle definition aucuns se travaillent grandement pour sçavoir si Chirurgie doit estre honoree du nom de science, ou d'art seulement. Ausquels y a responce tresfacile.

Premierement, qu'en Chirurgie ainsi qu'en Medecine il y a deux choses: c'est à sçavoir, les theoremes, & la partie pratique ou operative. Les theoremes sont les principes & les conclusions qui sont deduittes d'iceux par demonstrations. Quant aux theoremes,

ils sont certains comme les autres theoremes de medecine, comme, Qu'une chose est ostee par son contraire: comme, ce qui est selon nature demande sa conseruation: & qui est contre nature, son ablation. Parquoy la connoissance des conclusions deduittes d'iceux principes, doit estre appelee Science, comme chose acquise par demonstration, de laquelle demonstration la propriete est, faire sçauoir, c'est à dire, faire cognoistre vne chose par sa cause & raison. Et quant à la notice des principes (qui est dite intelligence, ou intellect) icelle doit estre estimee plus craintive que la cognoissance des conclusions prouuees & notifiees par iceux. Car comme l'œil cognoit les couleurs moyennant la lumiere seulement,

& la lumiere sans autre moyen, ainsi l'entendement humain cognoit les conclusions de toutes sciences, moyennant les principes d'icelles: & lesdicts principes sans probation & sans autre moyen de probation intellectuelle, ce qui est dict signamment: car il y a aucuns principes qui de prime face ne sont cogneuz & approuvez vrayz par l'entendement humain: mais est necessaire quelque probation, ou experience sensuelle pour l'induire à la recreance d'iceux, ce qui n'est necessaire à tous principes: car ceux qui sont des Logiciens appelez dignitez, sont sans aucun aide approuvez de l'entendement humain sain & de bon jugement: comme, que le tout est plus grand que sa partie: desquels si aucun at-

tentoit faire probation, il seroit semblable à celuy qui voudroit d'une torche donner lumiere au Soleil à midy.

Mais la partie pratiquee ou operative, qui est application desdicts theoremes & regles vniuerselles, au cas particulier, dechet du degré de science, & doit estre simplement appelée art (prenant le nom d'art proprement, & aussi qu'il est l'une des cinq vertus intellectuelles, & different de science) par ce qu'elle est coniecturative, non d'une coniecture prise legèrement, mais artificieuse & prochaine de science. Et combien qu'icelle partie pratique soit deduite & extraicte desdicts theoremes certains, si est-ce qu'elle dechet du degré de certitude scientifique, à

à la Chirurgie Dogmatique. II

cause de la quantité des remèdes, & du temps qui (comme dit Galien au premier liure à Glaucon) sont respectifs peculiers à chacun malade, & par consequent ne peuvent estre determinez exactemēt, mais seulement par doctrine generale & commune. Car le remède qui en certaine quātité est propre à vn malade, en pareille quantité est incommode, & nuisible à l'autre, encorés qu'il soit malade de pareille maladie. Et ce qui est conuenable en vn temps, est nuisible en l'autre, comme il appert clairement en la curation des apostemes, ausquels si ce qui appartient en l'estat est appliqué au commencement, ou accroissement, il sera grandement dommageable. Et si quelqu'un pour defendre per-

tinacement que Chirurgie ne doit estre appelée science, allegue qu'elle est par Aristote nombree entre les arts mechaniques ou serviles, luy faut respondre, que ce est entendu de la partie operative, ou pratique, & non des theoremes d'icelle, qui sont parties de philosophie naturelle. Outre, s'il est trouué en quelque autheur que la partie theorique de Chirurgie soit appelée art, à ce faut respondre que Geometrie, qui est des plus vrayes & certaines sciences, est aussi aucunes fois appelée art, quand il est dict qu'il y a sept arts liberaux, du nombre desquels elle est, selon laquelle maniere de parler, art est prins pour science, pour la societé qui est entendre les habits des vertus intellectuelles de

l'ame, qui sont cinq, science, intellect, sapience, art, & prudence, desquels parler plus amplement n'appartient à ceste presente contemplation. Et combien que l'art de Chirurgie en vsant de ses preceptes, quelquefois ne paruienne à la fin pretenduë, qui est santé conseruee ou restituée, non pour ce doit elle receuoir aucun blasme, car ce prouient de l'ignorance d'aucune circonstance particuliere, laquelle l'art n'est tenuë, & ne peut cognoistre: Comme, si vn architecte auoit posé les fondemens de quelque bastiment en terre de suffisante espaisseur, profondeur, & de bonne matiere, & que ledit bastiment tost apres tombast par terre à cause de quelque cauité ou veine de terre non solide, qui

estoit plus bas que lesdits fondemens, inconnuë audit architecte, lors il ne doit estre blasmé, ny son art: car cela est prouenu de la constance particuliere, laquelle il ne pouuoit cognoistre ne deuoit enquerir: parquoy il est dit raisonnablement des anciens, qu'il suffit faire ce que l'art commande. Et si ce que l'art commande est dirigé par vne notice experimentale, lors la fin pretenduë prouiendra plus facilement, & sera conuë la verité des preceptes, sur lesquels est fondee l'operation du chirurgien, & est icelle acquise par exercitation és cas particuliers, & par memoire. Parquoy non sans raison disoit Galien en sa Methode, que comme à vn homme, qui veut marcher, deux iambes sont neces-

à la Chirurgie Dogmatique. 15

faire: aussi à vn Medecin sont necessaires deux parties, c'est à sçauoir, Methode des choses vniuerselles, & exercitation és choses particulieres, auxquelles ne faut obmettre à adiouster prudence, qui naturelemēt doit estre au Medecin & au Chirurgien.

Methode selon Galien, est vne voye vniuerselle, qui est commune à plusieurs choses particulieres. Mais deuant qu'entrer plus amplement en l'explication de la nature & excellence de la Methode, & de ses indications, il faut sçauoir qu'en l'art de medecine, & par consequent en Chirurgie, qui est d'icelle subalterne, y auoit anciennement trois sectes, desquelles est faite mention par Galien en sa Methode.

Se^{cte}, est vne collection d'hommes qui sont d'une mesme opinion, & differens des autres. Se^{cte} medicinale est triple, Methodique, Empirique, & Dogmatique ou Rationale. La se^{cte} Methodique est ainsi appellee, parce qu'elle vsoit de peu de preceptes & reigles, lesquelles elle iugeoit suffisantes. Parquoy disoit que la vie de l'homme estoit longue, & l'art de medecine briefue, & blasmoit l'admirable Hippocrate, qui auoit escrit l'opposite au premier de ses Aphorismes. Ice^{lle} se^{cte} disoit qu'il n'y a que trois especes de maladies au corps humain. La premiere, par adstri^{cti}o d'atomes ou substances impartibles, desquelles le corps humain (selon leur opinion) est compose. La seconde par relaxation

xations d'iceux. Et la tierce composée des deux, en sorte qu'aucuns atomes sont relaxez, & les autres ferrez ou compacts, plus que la nature du corps, ou de la partie ne requiert. Et pour auoir plus ample intelligence de ce propos, faut sçauoir qu'icelle secte Methodique a prins son origine de la philosophie de Democritus & Leucippus, qui estoient persuadez par quelques raisons apparentes, que les elemens & principes de toutes choses naturelles estoient petites substances impartibles qu'ils appelloient atomes, qui n'auoient aucunes qualitez premieres, secondes, n'autres: mais selon diuerses situations & positions d'icelles, toutes qualitez estoient causees: parquoy quand vne chose chaude

deuenoit froide, ce prouenoit parce que les atomes d'icelle estoient varieez & transposez. Sur lequel fondement constituant leur art les Methodiques, disoient iceux atomes estre les principes & elemens du corps humain, & que la santé de l'homme est en son estre & perfection, quand lesdits atomes estoient en certaine & mesuree distance & positions.

Laquelle si elle estoit variee par approximation ou distance desmesuree, lors prouenoient deux especes de maladie, & la tierce des deux mixtionnee, en laquelle y auoit relaxation d'aucuns atomes, & constriction des autres. Selon ceste theorique, ils fondoient leur methode vniuerselle sur trois principes, lesquels ils appelloient com-

munitez, qui estoient deduiets du principe general de tout l'art de Medecine, qui est que chacune chose est cures par son contraire: desquelles la premiere est, que maladie prouenant par astriction d'atomes, requiert relaxation. La seconde est, que maladie causée de relaxation d'atomes requiert adstriction. Et le tiers est composé des deux. Puis faisoient plusieurs autres communitez particulieres, desquelles parle souuent Galien en sa Methode, comme que vlcere simple requiert vnion. Vlcere caué requiert repletion. Vlcere avec chair excroissante, demande consommation, & ainsi des semblables. Ces communitez, sont les premieres indications, & ne sont partie de chirurgie, ou bien petite, car elles

sont connues du vulgaire. Parquoy icelle secte est souuent reprouuee de Galien, au tiers de sa Methode. La seconde secte est dictée Empirique, qui a prins son nom des experimens, parce qu'elle contemne toutes raisons, disant que la nature du corps humain & des medemens est inscrutable & incomprehensible par raison humaine. Ce qu'ils disent euidemment apparoir, parce que les plus celebres & excellens philosophes & Medecins, apres grans labeurs & diligentes inquisitions, n'ont peu comprendre dont estoient composez les corps humains, ne les autres choses produictes par nature. Car si les raisons de ceux qui disent que le corps humain est composé des quatre elemens, sont confide,

rees, elles seront trouuees probables: toute fois elles ne seront trouuees necessaires & irrefragables. Aussi est probable l'opinion de Democritus & Asclepiades, qui enseignent toutes choses constantes par nature, estre composees d'infinis atomes consemblables ou similaires, c'est à dire d'une mesme nature, nom & raison. En ceste controuerse & contrarieté d'opinions entre si excellens philosophes, comme Hippocrates & Asclepiades, de la structure & composition première du corps humain, les Empiriques concluent, que temeraire sera celuy qui s'osera entremettre d'estre iuge de la verité de leur sentence. Parquoy selon leur iugement, puis qu'ainsi est que nostre nature est incogno-

scible, mieux vaut suiure & obseruer les experimens, & construire l'art de Medecine des choses conues par nostre experience, mesprisant la cognoissance baillee par raison des elemens, des temperamens ou complexions, des maladies, des causes d'icelles, & de leurs remedes.

Les Empiriques donques constituent leur art de quatre choses, de nature, de fortune, de reuelation, & d'imitation.

Declaration du premier.

L'Empirique voyant vn homme detenu d'vne fièvre vehemente (pour l'ablation de laquelle n'a esté ordonné aucun remede) ce neantmoins a esté terminee par flux de sang du nez, ou d'autre partie, prouenu par la force & prouidence de

nature, lors il iuge & reserve en memoire, qu'à vn homme detenu d'une pareille fièvre, la phlebotomie faite par art est necessaire, ou pour le moins conduisible. Pareillement ledit empirique prend vne partie de ses theoremes de l'observation qu'il fait de la nature des bestes brutes, comme quand à l'imitation de la cigogne, il use de clysteres. Aussi quand il use de certains medicamens qu'il a connu estre utiles contre les venins, desquels l'usage a esté monstre par les bestes.

Declaration du second.

Si quelqu'un estant travaille de douleur en la partie posterieure de la teste, tomboit par fortune sur quelque pierre qui luy causast flux de sang de la veine du front, dont

la douleur luy fust appaisée, lors l'empirique enseigné de ceste fortune, cueilleroit vn theoreme de son art, qu'à la douleur de la partie posterieure de la teste, la phlebotomie de la veine du front seroit vtile. Et quand Hippocrate a fait vn aphorisme de ce point, ils disent qu'il en a eu la cognoissance, non par raison, mais par seule experience.

Declaration du tiers.

Ce qu'ils auoient connu par la reuelation des Dieux, ou de leurs precepteurs, ou par songes (lesquels Galien n'a quelquefois contemnè en la curation des maladies) leur estoit pour regle, principalement quand ils les auoient soumis à l'examen d'experience, laquelle ils auoient trouuè conforme à iceux.

Declara-

i Declaration du quart.

Les empiriques faisoient mutation par similitude d'une maladie à une autre, d'une partie à une autre partie, d'un remède à l'autre, pour quelque similitude à ce les induisant. Ce qu'encore faisons souvent en nostre temps, comme quand auons prins l'usage de l'unguent dict Sarracenicum, en la curation de la maladie venerienne, qui auoit premierement esté inventé pour la curation des mauvaises galles, & long temps deuant l'origine de ladite maladie. Pareillement faisons nous quand aux ulceres malings de ladicte maladie estans à la gorge au lieu dit fauces, nous faisons phlebotomie des veines, sous la langue, apres auoir fait section de la Cephalique, ce

C

que trouuons estre vtile comme en angine ou squinanchie. Et cela se pourroit exemplifier en plusieurs cas particuliers, que i'obmets pour euiter multiplication de langage sans necessité. Icelle secte empirique contre l'opinion des dogmatiques, mesprisoit l'art anatomique des corps humains, comme chose execrable & cruelle, qui toutéfois (selon que sera tantost prouué par les dogmatiques) est de grande efficace pour la curation des maladies, & pour plusieurs autres raisons deduites par Galien au second chapitre du dixseptiesme liure *De vsu partium*, & allegues par les auteurs de Chirurgie.

La troisieme secte est des Dogmatiques, qui par iugement & rai-

son enquierent la première composition & vrais elemens du corps humain, outre les parties similaires, qui sont elemens sensibles, & non vrais dudit corps. Les temperamens prouenus selon la diuersité de la mixtion d'iceux. Les vertus prouenant desdits temperamens, les operations d'icelles. La nature des maladies. Leurs causes, les symptomes dependans d'icelles, & par lesquelles elles sont conues. Puis enquierent la nature des simples, la maniere de les composer par certain art, le temps opportun & le droit vsage d'iceux, qui sont choses qui requierent vn long temps, & pour lesquelles cōprendre, la vie d'vn seul homme ne seroit suffisante, si elle estoit comparee avec l'invention d'icel-

les. Parquoy raisonnablement disoit Hippocrate, que la vie de l'homme est briefue, & l'art longue, ce qui ne se doit entendre cruëment, comme font plusieurs. Car il n'entend par ce propos, que l'homme ne puisse avec l'aide du labeur des anciens philosophes, comprendre l'art de Medecine : mais qu'il ne pourroit, pour la briefueté de sa vie, icelle inuenter & acquier complètement sans aide. Et combien que la raison pour la pluspart soit directive de ceste secte dogmatique, si est-ce que si elle cognoist par experience quelque médicament, de l'effect & vertu duquel raison ne peut estre donnée (cōme sont ceux qui operent par propriété occulte) elle ne reiette l'usage d'iceluy, ains l'accōmode à

son art, pour le rendre plus riche & abondant en remedes, & plus facilement paruenir à la fin pretendue par sondict art, qui est santé. Le prince d'icelle secte comme plus excellent a esté Hippocrate, puis Erasistratus, Diocles, Herophilus, & plusieurs autres grands philosophes exercez en la philosophie naturelle. Icelle secte contre l'opinion des empiriques dit, que anatomie doit estre faicte, mesmes quelque fois és corps vi- uans : ce que faisoit Herophilus qui impetroit des Roys les hommes ayans merité la mort pour leurs delicts, & les dissequoit vi- uans pour cognoistre plusieurs operations interieures, qui sont abolies és corps morts, comme les mouuemens interieurs de la partie

vitale, du diaphragme, la respiration, la comprehension que fait l'estomac de l'aliment lors qu'il le transmue par sa coction. Et disoit qu'il estoit loisible par le tourment de peu d'hommes meschans, profiter à la santé de innumerables hommes vertueux. Et est vray semblable qu'il leur donnoit quelques medicamens narcotiques ou stupefactifs, pour leur oster ou diminuer le sentiment: & par consequent, la douleur: ce que quelque fois auons conseillé à ceux auxquels la pierre deuoit estre extirpee de la vessie par incision du lieu dict *perineon*. Aussi font lesdicts dogmatiques, anatomie es corps morts, pour cognoistre plusieurs choses de grande vtilité en l'art de Medecine. Premièrement, la sub-

Rance des parties , comme que le cœur est lacerteux , le foye charneux , & comme sang coagulé. Secondement , la quantité ; comme que le foye est de telle grandeur , & plus grand que la ratte. Tiercement , pour cognoistre la colligance des parties , comme qu'il y a communication entre l'estomach & le cerueau , & conuient semblablement entre l'orifice de l'estomach & le cœur , à cause de l'artere *aorta* , qui en montant en haut dessus l'espine , se associe au dict orifice . de laquelle theorique prouient la cognoissance des maladies qui sont par consentement ou principales , qui est chose qui grandement importe aux curationes des maladies. Quartement , la qualité ou temperature de cha-

cun membre avec quelque aide de raison : comme que le foye est chaud & humide , par ce qu'il est veu estre sanguin. Item que les nerfs & os sont froids & secs , par ce qu'ils sont exangues. Quintement , pour cognoistre le nombre des parties , comme qu'il y a six intestins , deux membranes à l'estomach , cinq lobes au foye , deux poulmons. Sextement, pour la cognoissance de la figure , comme que le foye est d'une part caue , & de l'autre part laquelle il ataint au diaphragme , il est gibbeux. Item pour cognoistre l'action & vtilité des parties, comme que le foye est principe de sanguification, le cœur principe de la vertu & mouvement vital. Pareillement que les os, combien qu'ils n'ayent action, si est-ce

qu'ils ont vtilité, ou de soustenir ou de defendre les parties nobles, comme le crane, le cerueau, les os pectoraux, les parties vitales. Puis sert icelle anatomie pour la cognoissance de la situation des parties, comme que le foye est en l'hypochondre dextre, la rate au senestre, les reins aux parties lumbales. Et pour le dernier, elle sert à la cognoissance des parties offesees de maladie, comme que dysenterie est faiëte aux intestins, iëtericie ou iaunisse au foye, la pierre és reins ou en la vessie, la pleure sie à la membrane interieurement adiacente aux costes. Lesquelles choses ont esté colligees des documens de Galien par Alexandrinus commētateur des Epidimies d'Hippocrate. Et par ce que

icelle se fte ptocede par methode, & par consequent par indications, qui aucunesfois sont simples, & aucunesfois compliquees : il faut parler d'icelles, succinctement & par ordre.

Methode est vne voye vniuerselle pour cognoistre verité, qui est commune à plusieurs choses particulieres. La proprieté de methode est de pouuoir paruenir d'un petit principe aux choses particulieres, & examiner & iuger par theoremes scientifiques, comme regles, ce qui a esté par les autres mal dict & déterminé, comme declare Galien au second liure *de tuenda sanitate*. Methode procede par indication. Indication est insinuation ou instruction de ce qui est à faire. D'ocques indication enseigne l'in-

vention de ce qui est à faire : Car
inventer vne chose par indication,
est commencer à la nature de la
chose, puis inventer sans experien-
ce, ce qui est consequent à icelle
nature. L'invention des choses
cherchees par indication, est fon-
dée sur quatre regles generales,
desquelles depend tout l'artifice
de methode : desquelles la pre-
miere est, Ce qui est selon nature,
demande ou indique sa conser-
vation. La seconde, Ce qui est
contre nature, demande son abla-
tion. La tierce, Conservation est
faicte par choses semblables. La
quarte, Ablation est faicte par cho-
ses contraires. Ces regles genera-
les sont particularisees selon les
indications speciales ou particu-
lieres. Comme que ylcere caue

requiert ou indique repletion. Intemperature chaude, refrigeration: & est chacune desdictes speciales indications, deduite de deux generales. Indication est prinse de chacune des trois choses, sur lesquelles est fondee toute speculation de Medecine. C'est à sçauoir, des choses naturelles, comme de la vertu: des choses non naturelles, comme de la disposition de l'air qui nous environne. Des choses contre nature, comme de la maladie & de sa cause. Complication, est aggregation de plusieurs choses, desquelles chacun ne propose son indication. Par ceste definition, complications ne sont dictes sinon pour le regard des indications. Car combien qu'en aposteme il y ayt plusieurs maladies, c'est

a sçauoir , intemperature ou dyscrasie , mauuaise composition , ou maladie organique , & solution de continuité, ou sensible , ou intelligible : toutesfois dependant des choses sensibles , non pource y a il complication en iceluy pour l'vnité de l'indication dont elles sont conioinctes , & par laquelle elles sont reputees comme vne simple maladie : ainsi que plusieurs bastons ensemble liez sont reputez vne chose , à cause du lieu dont ils sont conioincts. Semblablement, combien qu'une maladie soit accompagnée de plusieurs symptomes ou accidens , non pour ce faut il reputer ceste assemblée estre complication , par ce que lesdicts symptomes ne proposent aucune indication, sinon qu'ils excédassent

leur magnitude reguliere: comme quand la douleur estant accident de quelque maladie est si importante qu'elle prosterne la vertu: auquel cas douleur prendroit nom & nature de cause, & changeroit par accident l'ordre & raison de curation reguliere, pour la lesion qu'il feroit à la vertu, ou à la disposition avec laquelle il seroit conioinct, icelle augmentant pour son attraction ou autrement: comme, quand douleur est conioinct avec aposteme, il fait augmentation d'iceluy, à cause de la fluxion qu'il y attire. Et comme indication est prinse des choses naturelles, non naturelles, & contre nature: aussi complications sont prinse desdictes trois choses, & en plusieurs manieres. Premièrement, de cho-

se naturelle & contre nature, comme de la vertu & de la maladie. Secondement, de chose naturelle & non naturelle, comme du temperament & complexion du malade, & de la disposition de l'air qui nous environne. Puis de plusieurs choses contre nature, comme en playe & aposteme, comme ulcere avec varice, fluxion, ou dyscrasie. Et quant à la complication de maladie avec symptôme, elle est reduicte sous la complication de maladie avec cause : car symptôme entant que symptôme n'indique aucune chose, parquoy il ne peut estre dict cōpliqué : mais bien comme cause, quand il excède, ainsi qu'il est predict. Et par ce qu'il ne suffit sçavoir ces choses par seule Theorique, mais les faut accōmo-

der à la partie pratique ou operative, qui est la fin de la theorique: en tout art pratique, il faut regler les choses dessusdictes par certaines reigles deduiètes de Galien au septicisme de sa Methode, pour les accommoder à l'œuure : il faut doncques en toutes complications considerer l'ordre, le plus vrgent, & la cause. Cest artifice est de grande efficace, & comme vn filet pour soy retirer hors du labirinthe ou dedalus des complications, qui par autre voye sont tres-difficiles à gouverner, principalement aux empiriques. Premièrement doncques, il faut considerer le plus vrgent, qui est ce dont il depend plus grand peril : Comme s'il y auoit complication d'aposteme, flux de sang, intemperature, conuulsion, douleur

à la Chirurgie Dogmatique. 41
douleur & vlcere. Lors si conuul-
sion est la plus vrgente, il faut pre-
mierement diriger son intention
à icelle, sans toutefois negliger les
autres indications : & aussi qu'il
y a plusieurs indications, dont l'y-
ne est la plus forte : aussi faudra-il
que le remede soit composé, ayant
toutefois plus de respect à icelle.
Secondement, il faut considerer
l'ordre des dispositions compli-
quées : car aucunes fois leur cōpli-
cation est telle que l'yne requiert
estre ostee deuant l'autre, & autre-
ment ne pourroit estre faict, cōme
quād aposteme & vlcere sont en-
sēble en vne partie, il seroit neces-
saire premieremēt faire ablatiō de
l'aposteme : & qui premieremēt at-
tenteroit faire ablation de l'vlcere,
il attēteroit chose impossible pour

l'ordre qui est tel en icelles dispositions, par ce que ablation de l'ulcere ne peut estre faicte que la partie en laquelle il est, ne soit saine, ce qui ne peut estre quand il y a aposteme. Tiercement, quand plusieurs dispositions sont compliquees: desquelles l'une est efficiente de l'autre, il faut premier suiure l'indication de la cause, que de ce qui est effect d'elle, qui est en plusieurs lieux document perpetuel de Galien, principalement au troisieme de l'art medicinale. Comme quand il y a complication de varice, ulcere, & fluxion, il faut diriger son premier conseil à la fluxion ostant la quantité ou qualité, dont elle est causée: puis curer la varice, & apres l'ulcere. Et par ce que aux discours

des choses dessusdictes est faite mention de plusieurs choses qui n'ont esté notifiées par leurs definitions: & par ce moyen pourroient rendre quelque obscurité, il est necessaire les deduire selon l'ordre donné des anciens, desquels il ne faut déuoyer, sinon en erreur manifeste, auquel cas il ne les faut reputer auteurs, non plus que Aristote sur le propos qu'il a affirmé, que le monde n'auoit eu aucun commencement, qui ne doit estre tenu pour autorité: car autorité est le dict d'un auteur bien & vrayement affirmé. Parquoy faut icelles choses notifier par diuisions & definitions, qui sont instrumens par lesquels on parvient (avec certains principes) à la demōstration, par laquelle les pro-

prietez actiues & passives de toutes choses , sont scientifiquement connues , comme il est plus amplement dedui&t en la science de Logique , de laquelle le Chirurgien rationnel ne doit estre ignorant.

Doncques, toute la contemplation de l'art de medecine , & par consequent de chirurgie , sans cōprendre les instrumens , est redui&te sous trois choses , qui sont dites naturelles , non naturelles , & contre nature. Choses naturelles sont celles qui par soy concurrent & entrent en l'integrité & perfection du corps humain.

Choses naturelles sont,

Elemens.

Temperature.

Humeurs.

à la Chirurgie Dogmatique. 45

Membres.

Vertus.

Operations de vertus.

Esprits.

Ausquelles aucuns modernes
ont annexé.

Aages.

Couleurs.

Figures.

Sexes.

Element, est la plus petite partie de la chose de laquelle elle est element: ou element selon Aristote, est duquel, comme premier & tres-simple, toutes choses sont faites, & en quoy, comme premier & tressimple elles sont resoutes.

L'art de Medecine contemple deux manieres d'elemens.

Intelligibles.

Sensibles.

Les elemens intelligibles, sont ceux qui sont compris & connus par seule speculation d'entendement, & ont esté premierement connus par Hippocrate, qui sont quatre.

Feu.

Air.

Eau.

Terre.

Les elemens sensibles du corps humain, sont ceux qui sont iugez simples & premiers, quant à la cognoissance sensuele: combien que absolument ils ne soient elemens, ne simples. En cestuy iugement l'entendement se monstre estre plus excellent, que le sens duquel il corrige souuent le iugement: Comme que le Soleil ne soit plus grand au matin qu'à midy, combien que le

sens iuge le contraire. Iceux elements sensibles sont autrement appelez parties similaires ou consemblables du corps humain, qui sont les os, cartilages, cher, nerfs, veines, arteres, panicules, ligamens, tēdons, le cuir, la moëlle & la graisse: ausquelles on peut adiouster aucunes parties qui sont faictes des superfluitez dudit corps, toutefois non sans vtilité, comme le poil, les ongles. Et mesmes quant à la graisse, il semble qu'elle soit moyenne entre les deux, c'est à sçauoir, entre les vrayes parties & les parties de superfluité.

Des temperamens ou complexions.

Temperament, est vne commixtion de quatre elements: ou temperament est vne qualité qui pro-

uient immédiatement de l'action & passion des quatre qualitez premières. Les quatre qualitez premières sont chaleur, froideur, siccité & humidité. Et sont appellees premières, parce que d'elles pro-
viennent les qualitez secondes & autres, comme couleurs, odeurs, saveurs, ou parce qu'elles sont qualitez des premières substances, qui sont les elements.

Temperament.

Temperé.

Intemperé.

Temperament temperé.

Ad pondus.

Ad iustitiam.

Temperamēt temperé *ad pondus*, est celsuy qui est composé d'éga-
les portions de quatre elements, &
est encore double iceluy tempe-
rament.

raiment.

Au iugement du sens.

Au iugement de l'entendement.

Le temperament temperé *ad pondus* selon le iugement du sens, est celuy qui selon le iugement du sens contient égales portions des elemens en sa composition & substance.

Entre toutes les choses naturelles, il n'en y a qu'une seule ainsi temperée *ad pondus*, sensuelle, qui est la peau interieure de la main de l'homme temperé, qui a esté composée telle par la prouidence de nature, pour estre organe du sens, cognoissant les qualitez tactibles: car si nature eust mis aucune des qualitez premieres avec quelque excés par dessus la contraindict organe, elle eut empes-

E

ché la cognoissance & iugement du tact: comme quand l'homme ayant la main fort refroidie, touche les choses de chaleur mediocre, il ne les trouue chaudes, ou de telle chaleur qu'elles sont, ainsi que si nature eut mis quelque son aux oreilles, il troubleroit l'action du sens auditif, empeschât la cognoissance des sons extérieurs. Et ne doit estre trouuee estrange ceste opinion du temperament *ad pondus*: car elle est fondee en Galien au premier & au second liure des temperamens. Et quant au temperament *ad pondus*, selon le iugement de l'entendement, disputer de luy est inutile à l'art de Medecine: mais appartient au philosophe naturel, qui specule les choses plus vniuersellement, &

à la Chirurgie Dogmatique. 51
moins sensuellement.

Temperament temperé *adiustitiam*, est celuy qui est temperé selon sa dignité & exigence de sa nature, & est connu par ses operations: car quand vne chose constant par nature a toutes les operations appartenantes à son espece tresbônes & tresparfaites, elle est iugée temperée *adiustitiam*. Ledit temperament est la reigle & mesure pour mesurer, & cognoistre tous les autres temperamens: car sans la cognoissance d'iceluy n'est possible sçauoir qui est le temperament chaud & sec vulgairement appellé Cholerique, & aussi des autres. Car le temperament chaud & sec n'est ainsi appellé, parce qu'en luy l'elemēt chaud surmonte le froid, & le sec l'humide

absolument: mais parce que quand il est comparé avec le temperé, il est plus chaud & plus sec que luy. Aussi faut iuger du phlegmatique & des autres temperamens: parquoy doit estre trouuee vaine l'opinion de ceux qui disent qu'il y a quatre complexions seulement: car en ces quatre n'est comprise la complexion temperee, qui est la principale, & la plus noble de toutes les complexions, & sans laquelle n'est possible entendre toutes les autres, comme efficacement prouue Galien au premier liure des temperamens. Parquoy outre ladite complexiõ temperee, il y a huit autres complexions, ou temperamens intemperez, qui toutesfois sont dedans la latitude & limites de santé.

Car aucuns excèdent le temperé en vne seule qualité, qui sont appelez simples, & les autres en deux, qui sont composés ainsi qu'il s'ensuit.

Temperament intemperé

Simple.

Composé.

Simple.

Chaud.

Froid.

Sec.

Humide.

Composé.

Chaud & sec.

Chaud & humide.

Froid & sec.

Froid & humide.

Les signes par lesquels sont cogneuz lesdicts temperamens, sont descripts par Galien au premier

liure de l'art medicinale, autrement
appellé, *Ars parua*.

Sur ceste matiere il faut noter
qu'ainſi que quand nous voulõs ſça-
voir le temperament d'un particu-
lier de quelque eſpece, il le faut en-
querir par la comparaifon de luy
avec le temperé en icelle eſpece:
auſſi ſi nous voulons ſçauoir la tē-
perature de chacune des par-
ties du corps humain (entre les-
quelles il y a grande diſſimilitu-
de) il la faut comparer avec la
partie la plus temperee d'iceluy,
qui eſt la peau interieure de la
main: comme ſi nous voulons ſça-
voir le temperament de la chair,
nous dirõs qu'elle eſt chaude & hu-
mide, parce que quand elle eſt cō-
paree avec la partie temperee, elle
eſt plus chaude & plus humide que

elle: & est ladite partie temperée, non seulement temperée entre les parties du corps humain: mais entre toutes les choses generables & corruptibles. Par cest artifice, il faut iuger la temperature de l'os, du nerf, cartilage & autres similaires. A ceste matiere faut adiouter incidentalement, que la temperature des medicamens est autrement conneuë que par les manieres predictes. Car quand vn médicament est dict froid ou chaud, il est iugé tel, seulement par l'operatiõ qu'il fait quand il est appliqué au corps humain temperé, sans enquerir quel il est en sa nature, & quelelement domine en luy. En la temperature desdits medicamens, quatre degrez sont assignez par dessus le temperé, qui n'a au-

cune graduation ou eleuation de degré.

Le premier degré des medicamens.

Chaud, Eschauffe.

Froid, Refroidist.

Sec. Desseche.

Humide, Humeete.

Non manifestement, en sorte qu'il a besoin de quelque demonstration rationele.

Le second degré.

Eschauffe.

Refroidist.

Desseche.

Humeete.

Manifestement, en sorte qu'il ne se peut nier, & n'a besoin de demonstration.

Le tiers degré est de medicamens qui

Eschauffent.

Refroidissent.

Dessechent.

Humectent.

Veheinement, mais non extrêmement.

Le quart degré des medi-

camens,

Chaud. Brusle, & fait escarre
comme chaulx.

Froid. Mortifie par froideur
comme ciguë.

Sec. N'est auëû trouué qui
ne soit bruslât, comme
cautere actuel.

Humide. D'iceluy Galië ne fait
mention parlant de
ceste matiere.

Et parce que tous medicamens
graduez en pareil degré, ne sont
totalement semblables, raisonna-

blement en chacun degré a esté assignee latitude , qui est diuisee en trois: C'est à sçauoir, commencement, moyen, & fin. Et combien que les anciens deuant le temps de Galien n'ayent ainsi gradué les medicamens, comme il appert par Dioscoride, toute fois l'inuention d'iceux est artificielle & vtile . Car il ne suffit appliquer à vne maladie chaude tout médicament froid, sans autre limitation & consideration: mais faut que selon l'excès de l'intemperature & laps en chaleur, soit proportionné le médicament en pareille contrariété, selon quelque coniecture artificielle & prochaine de science ; & non tousiours par certaine science , de laquelle ne sont capables plusieurs choses medica-

les.

Des humeurs.

Humeur, est vne substance humide, liquide, en laquelle l'aliment est premierement conuerty.

Humeurs.

Sang. Chaud & humide.

Phlegme, Froid & humide.

Colere. Chaude & seche.

Melancolie, Froide & seche.

Le plus parfait d'iceux est le sang, puis le phlegme, & apres la colere, & le dernier en bôté, est la melancholie. Icelles quatre humeurs sont en toutes complexions necessaires: car elles correspôdent aux quatre elemēs qui sont en nostre corps: car chacune partie est nourrie d'humeur, & aliment semblable à sa nature, comme les plantes en la terre. L'origine desdictes

quatre humeurs prouient des alimens , qui sont composez des quatre elements , & sont iceux alimens par la premiere coction conuertis en vne substance, qui est appellee *Chylus* : auquel ne sont que potentiellement les quatre humeurs : mais elles sont mises en estre actuel par l'operation sanguifique du foye, comme le poulet est fait de l'œuf par la chaleur naturelle de la poule.

Sang.

Simple, qui est seulement connu par l'entendement, composé des quatre humeurs, qui autrement est appelé *massa sanguinaria*, en laquelle composition domine le sang simple, qui est distingué formellement des trois autres humeurs, avec lesquels il est meslé.

Quand icelle masse deflue en quelque partie par l'action de la vertu expulsiue, combien qu'en elle y ait portion des trois autres humeurs selon leur proportion, toutesfois elle cause vne maladie simple, c'est à sçauoir, phlegmone ou inflammation; en laquelle, combien qu'il y ayt portion des autres humeurs, c'est à sçauoir, colere, phlegme, & melancholie: non pour ce est elle dictée composée, mais simple: car les signes & symptomes des autres humeurs ne se manifestent sensuellement, à cause que d'iceux y a trop plus petite portion que de sang. Et quand il y a maladie composée, comme phlegmone erysipelatodes, lors il est nécessaire que en ladicte masse

de laquelle est faicte la fluxion, il y ayt plus grande portion de colere, qu'il ne doit estre en ladicte masse sanguinaire selon nature. Parquoy les signes & symptomes de colere sont meslez & confus avec ceux qui prouiennent du sang : & ainsi faut entendre de la mixtion des autres humeurs, comme en phlegmone œdematodes, & phlegmone scirrholes.

Phlegme, est la plus froide, & plus humide chose qui soit au corps humain.

Les especes de phlegme sont,

Doux.

Salé.

Vitreux.

Acide.

Gypseux.

Phlegme doux est engendré du

à la Chirurgie Dôgmatique. 63

sang imparfaitement cuit, & est dict naturel, parce qu'il peut estre fait sang par plus ample coction.

Phlegme salé est fait par
Putrefaction.

Par mixtion d'humidité se-
reuse salée.

Phlegme vitreux est dict ainsi, par ce qu'il est semblable à du verre fondu, & est extrememēt froid, & est souvent trouué és corps des crapuleux & des vieillards, faisant extremes douleurs aux parties es-
quelles il descend, comme sur les
dents, & dedans les intestins.

Phlegme acide, est froid & sub-
til.

Phlegme gipseux, est celuy du-
quel le subtil est resolt, comme il
appert aux fluxions faites sur les
articles, esquels il engendre to-

phes & nodositez. Autres especes de phlegme sont assignees par aucuns Docteurs, qui sont reducibles sous les especes predictes.

Annotation.

Nature a estably & fabriqué à la melancholie son receptacle, qui est la ratte : & à la colere le follicule du fiel, par lequel elle est attirée : & à l'vrine a attribué l'attraction des reins : mais elle n'a ordonné au phlegme aucun receptacle, parce qu'il a plus necessité de coction que d'expulsion, selon Galien en son liure de *Virtutibus naturalibus*, ce qui est proprement entendu de celuy qui par plus ample coction est reducible en nature de sang, qui ne peut aduenir à toute espee de phlegme.

Colere, est humeur chaude & seiche,

seiche, engendree de la plus ignée
partie du chyle.

Colere.

Rouge, qui est prochaine à la
nature du sang.

Citrine.

Vitelline, qui est faite par mix-
tion de gros phlegme.

Prassine, qui pour la plus part est
engendree en l'estomach ayant
chaleur superflue, aussi est quel-
ques fois engendree de nourrisse-
ment cacochyme chaud, comme
ailz, oignons. Pareillement peut
estre engendree es veines par ex-
cessive chaleur.

Melancholie.

Naturelle,

Aduste.

Melancholie aduste est faite

De colere,

De melancholie naturelle.

Combien que melancholie faite par adustion, ayt aucune apparence de froideur, si est-ce que (à cause de l'adustion par laquelle elle est faite) il y a en elle quelque latente igneité, comme en la cendre : car en toutes choses lesquelles la chaleur imprime son action, est delaissee pour quelque temps vne igneité, qui peut par temps se euaporer, comme il appartient chaulx vieille.

Annotation.

Selon Auicenne & les autres modernes, toutes humeurs peuvent deuenir adustes, & par adustion prendre la nature de melancholie aduste, comme le sang & le phlegme, comme ils disent appa-

roir, par les espèces d'elephantiasis, qui peut estre faicte selon leur auis de chacune des quatre humeurs. Et par confirmation de ceste opinion, Galien confesse en sa methode, que toutes humeurs crasses sont aucunement melancholiques.

Pour plus ample intelligence de la nature des quatre humeurs & de la generation d'iceux, il faut sçauoir qu'il y a au corps humain trois coctions: Desquelles la premiere est faicte par le ventricule, vulgairement appellé estomach, conuertissant l'aliment en vne substance appelée Chylus, auquel les quatre humeurs ne sont que potentiellement.

Puis, par la seconde coction qui est faicte au foye, est faicte dudit

Chylus la masse sanguinaire, composée des quatre humeurs différens en nature & espece, & est icelle diuersité d'humeurs nécessaire au corps humain, par ce qu'il n'est simple, ny d'une seule nature: parquoy sa composition ne requiert nourrissement de simple vertu & faculté, à ce que chacune partie attire de ladicte masse ce qui luy est propre & semblable. La troisieme coction est faite en tout le corps hors des veines, & alors le nom d'humeur cesse, & sont engendrees les quatre humiditez naturelles, desquelles la premiere est appelée humidité innommée. La seconde, *ros*. La tierce, *cambium*: & la quarte, *gluten*. Apres la perfection de chacune desdictes coctions, prouiennent excre-

mens & superfluité. Car les excremens de la premiere coction, sont les excremens du ventre inferieur. Les excremens de la seconde, qui est sanguification, sont l'humeur, & limon melancholique, qui est attiré par la ratte, qui par la grand' vertu de ses arteres & chaleur le cuit, & puis se nourrit du meilleur, reiettant vne partie d'iceluy, qui est comme le marc du vin, à l'orifice de l'estomach, pour exciter l'appetit par sa vertu pontique. La colere est attirée par son follicule, à ce deputé de nature. Et la matiere sereuse & vrinale est transcolée par les reins en la vessie. La colere & melancolie d'icelle coction sanguifique, sont par aucuns Docteurs en vne maniere appellees naturelles, & en

l'autre non naturelles. Car d'autant qu'elles sont iectées hors de la masse sanguinaire , comme excremens & ineptes pour la nutrition des membres , elles sont raisonnablement dictes non naturelles , de naturalité de l'vniuersel nourrissement. Mais parce que nature sçait par sa prouidence tirer quelque profit & commodité d'icelles , enuoyant la colere dedans l'intestin, appelé *ieiunū*, pour inciter nature par son acrimonie & punction à l'expulsion des excremens contenus aux intestins : aussi pour dissequer & extenuer l'humour pituiteux , qui est engendré dedans l'intestin , dict *duodenum*. Et la melancholie à l'orifice de l'estomach, cōme il est predict , à ceste cause elles sont dictes naturelles.

à la Chirurgie Dogmatique. 71
les de naturalité, d'vtilité. Mesmes
la superfluité sereuse n'est sans
grande commodité, conduisant
comme vn chariot le sang par les
veines, desquelles aucunes sont si
exiles, qu'elles fuyent la cognois-
sance des sens, côme au milieu du
foye, en sorte que aysement en
icelles seroit faicte obstructiō, n'e-
stoit ladiete serosité, qui rend le
sang liquide, & fluide. Puis ladiete
commodité accomplie, elle est
pour la pluspart rauie des reins, cō-
me chose à eux agreable, par ce
qu'ils desirēt estre nourris de sang
sereux. Les excremens de la troi-
siesme cōction, qui est faicte en
chacun mēbre hors les veines, sont
deux, l'vn subtil & sereux, qui au-
cunemēt est aussi excrement de la
secōde cōctiō, par ce qu'il a cogna-

tió avec la substãce vrinale: lequel apres auoir porté le sang par les petites veines, est resoult par les pores insensiblement par l'action de la chaleur naturelle, quand elle est valide, & la diète serosité est en quantité non desmesurée. Mais quand la chaleur naturelle est debile, ou quand l'animal vse de nourrissement plus copieux qu'il n'appartient, ou quand il luy auie quelque mouuement vehement, lors elle est faicte visible, comme il appert aux sueurs & humiditez dont les playes sont humectées, comme il est deduiet par Galien au troisieme liure de sa Methode: parquoy ne se faut esmerueiller si mention est faicte de ces choses en ceste introduction chirurgicale: car sans ceste Theorique, ne peut

peut estre entendue la nature du médicament sarcoïque, ny pourquoy il est dessicatif moderemēt, & detersif, sans mordication. Le second excrement de ladicte coction est plus terrestre, duquel est faite generation du poil & de la sordicie, qui est à l'enuiron de nostre peau, comme chose farineuse: pour l'ablation de laquelle les anciens ont eu les bains & estuves en frequent vsage, parce que par l'obstruction qu'elle peut faire aux pores de nostre corps, elle nous prepare à maladie. De ceste superfluité prouient l'excrement terrestre, qui est trouué aux playes cauees, qui est appellé sordes, qui est detergé par le médicament sarcoïque. Il ministre aussi matiere à la generatiō du poil, comme dict est.

Des membres.

Membres, sont corps qui sont engendrez de la première commixtion des humeurs.

Membres.

1. Principaux.

2. Seruans aux principaux.

3. Ne gouvèrnans ne gouvèrnez par les autres: ains ont propres vertus, par lesquelles ils sont gouvèrnez.

4. Ayans propres vertus, & d'ailleurs prouenant.

Les membres principaux sont,

Le cœur.

Le foye.

Le cerveau.

Les genitifs.

Les membres seruans aux principaux sont,

Les artères au cœur.

Les veines au foye,

Les nerfs & la medulle spinale au cerueau.

Les vaisseaux spermatiques, tant deferens & expellens aux genitifs.

Les membres, ne gouuernez ne gouuernans les autres sont,

Os.

Cartilage.

Membranes.

Graisse.

Chair.

Ligamens.

Ce qui est dict des membres dernièrement recitez, doit estre entendu sainement: car la chair reçoit du foye influence de vertu naturelle par les veines, & la vertu vitale par les artères.

Les membres ayans propres vertus. & d'ailleurs prouenant sont,

Le ventre.

Les reins.

La matrice.

Outre ces parties il y a autres parties dictes excrementeuses, ou faictes de superfluitez pour aucune vtilité: comme les ongles, les poils, qui ne sont parties du corps, sinon improprement, auxquelles aucuns ont adiousté la graisse, qui toutefois semble estre moyenne entre les vrayes parties du corps & les excrementeuses.

Autre diuisiõ de mēbres, ou parties.

Similaires, qui comme est predit, sont appellees elemens sensibles du corps humain, comme os,

cartilage, chair, & autres.

Dissimilaires, organiques, ou instrumentaires, comme le foye, le cerueau, la main, l'œil, & autres.

Les parties similaires sont ainsi appellees, par ce que leurs parties ont vn meisme nom, & nature comme icelles: car la centième partie de l'os est dicté os, comme tout l'os.

Parties similaires.

Sanguines, comme chair, graisse.

Spermatiques, comme os, nerfs.

Les parties organiques sont ainsi appellees, par ce qu'elles sont organes ou instrumens des operations: comme la main, de la compréhension: l'estomach de la chylification. Aussi elles sont appellees dissimilaires, par ce qu'elles

sont diuisees quant au sens en autres parties, qui perdent le nom du tout : car vne membrane , qui est partie de l'œil , n'est dictē œil : & l'os qui est partie du doigt, n'est appelé doigt.

Annotation.

Quand aucune deperdition est faicte aux membres , la regeneration est faicte selon la premiere intention , & à la deperdition des membres spermatiques, elle est faicte selon la seconde intention.

Declaration de ce.

Chacune chose naturelle estant alienee de sa nature & degré de perfection , demande par vn instinct naturel soy reparer & remettre en tel degré qu'elle estoit auparauant, pour se conseruer ius-

ques au periode à elle dōné de nature qui est insupportable: combien toutefois que la chose naturelle peust prendre fin par cause violente deuāt le tēps dudiēt periode. Et quand elle fait icelle reparation semblable à ce qu'elle auoit perdu, elle est paruenüe à sa premiere intention. Mais si vne chose ne se pouuant remettre en son premier degré de perfection, cherche autre moyen approchant à ceste reparation, & elle y paruient, elle se repare selon la seconde intention, estant fraudée de la premiere. Cōme quand il y a deperdition de substance à l'os, nature voudroit reparer vne substance ossee, du tout semblable à ce qui est perdu: quoy ne pouuant faire, repare vne substāce diēte Callus, pour supplē-

ment de ce qui est perdu ; qui est
 fait d'une partie de l'aliment de
 l'os ; non par la vertu formative,
 mais par la vertu nutritive, tenant
 le lieu de la vertu formative ; ab-
 sente, & faisant par nécessité office
 à elle non propre : car son office est
 reparer ce qui est consumé par l'a-
 ction de la chaleur naturelle.

Des vertus.

Vertu, est une cause agente.
 Ou, vertu est, par laquelle nostre
 corps est régi.

Vertu

Vitale, Du cœur.

Naturelle, procédant Du foye.

Animale, Du cerveau.

A icelles on peut adiouter la
 vertu generative, puis que les ge-
 nitifs sont membres principaux.

Annotation.

Ces trois vertus ont mutuel
consentement de bien ou mal, en
sorte que l'offense de l'une cause
en l'autre lésion par consentemēt,
comme il appert par la lésion des
parties nerveuses, qui cause atro-
phie au membre paralytique. Auf-
si la confidence du Medecin estāt
en la vertu animale du patiēt, cor-
roboze la vertu vitale & naturelle,
en sorte qu'elle cuince plus facile-
ment la cause de la maladie.

Vertu vitale,

Operant.

Passive en operation, qui
proprement n'est vertu :
mais passibilité.

Vertu vitale operant.

Faisant dilatation du cœur &
des arteres.

Faisant constriction d'iceux.

Vertu vitale passive en operation,
Irafcible.

Exhilarative.

Vindicative.

Craintive.

Indignation, qui est reduite
sous irascible.

Vertu naturelle.

Attractive	Du familier & propre.
------------	--------------------------

Contentive,	De ce qui est attiré.
-------------	--------------------------

Concoctive,	Du contenu.
-------------	-------------

Expulsive,	De ce qui mo- leste la conten- tive.
------------	--

Annotation.

Ce qui moleste la vertu conten-
tive, peche en quantité seule, en
qualité seule, ou en tous les deux
ensemble.

Autre annotation.

Ces quatre vertus cedent l'une à l'autre leurs operations à certain temps, & ont comme intelligence mutuelle par vn instinct naturel: car la contentiue contient, tant que la concoctiue ayt fait son operation: puis viét la vertu expulsive qui fait son office d'expulsion.

Vertu animale.

Sensitiue.

Volontairement motiue.

Principante.

Vertu sensitiue.

Exterieure.

Interieure.

Vertu sensitiue exterieure.

Auditiue.

Visiue.

Odoratiue.

Gustatiue.

Tactive.

La vertu sensitive interieure est vnique, qui correspond aux cinq vertus sensibles exterieures, & par vn seul organe, parquoy est appellé sens commun. Pareillement la vertu motiue volontairement est vnique, diffuse du cerueau par les nerfs, muscles, & tendons du corps, & parce elle ne reçoit aucune diuision en autres especes.

Auicenne contre l'opinion de Galien, a mis vne vertu mixte au diaphragme, combien que raisonnablement Galien l'ayt affermé estre pure volontaire.

Vertu principante.

Imaginative.

Intellectiue, cogitatiue, ou raisonnable.

Memorative.

Annotation.

L'une desdictes vertus peut estre offensée sans la lesion des autres, qui est vn argumēt qu'elles ont diuers sieges & organes particuliers au cerueau.

Des operations des vertus.

Operation de vertu est effect, procedant de la vertu.

Annotation.

En autant de manieres est diuisee operation de vertu, que la vertu : parquoy n'est necessaite repeter superfluellement la diuision des operations des vertus.

Exemple de la conformité de la diuision des vertus, & leurs operations.

Operation de la vertu.

Vitale.

Naturelle.

Animale, & aussi les autres.

Des esprits.

Esprit est la plus subtile substance de nostre corps, qui est instrument prochain des vertus.

Esprit..

Vital.

Animal.

Naturel, duquel a parlé Galien avec doute, toutefois les recens l'ont affermé, & ont adiousté le quart, l'esprit genitif, qui disent estre composé des trois autres, qui est assez raisonnablement dict par eux.

L'esprit vital reside au cœur & arteres, & est fait de la vaporisation du sang & de l'air preelabouré aux poulmons, par la force de la chaleur vitale : puis est diffus

par les membres, pour la conseruation de la chaleur naturelle: car implantée aux membres, ne seroit suffisante pour la cōseruatiō, si elle n'estoit cōfortee par la chaleur influente, comme il appert par la sectiō des arteres de quelque partie.

L'esprit animal est faiët du vital, & reside aux ventricules du cerueau, duquel vne grande partie est diffuse és yeux par les nerfs optiques ou visoires, qui seuls ont cavité manifeste, & à cause de ce, le sens visif est le plus efficace de tous les sens, & qui de plus loing cognoist son obieët: à ceste cause, ceux qui ont perdu l'ysage des yeux, ont les autres vertus du cerueau plus valides, pour la redondance de l'esprit animal, qui n'est absumé à la yision: qui a

fait que aucuns Philosophes se sôt volontairement priuez de la veüe, pour auoir l'entendement plus pur & vif, ce qui est dict de Democritus. Sur ce propos est meüe vne question, qui est, si l'esprit animal est porté & transmis par les autres nerfs sensitifs & motifs substantiellement, ou seulement radieusement & par vertu, comme le rayon du soleil est transmis parmy la verriere, qui est chose problematique, & qui a raisons apparentes pour les deux parties. Toutefois il peut estre dict auec plus apparente raison, que l'esprit animal est porté par les nerfs optiques substantifiquement, & par les autres seulement radieusement, & par faculté & vertu: car le cerueau qui est membre froid & exangue,

exangue, ne pourroit suffire à faire generation de tât d'esprits qu'il seroit necessaire pour estre distribuez par tous les autres nerfs, ioinct, qu'en iceux n'y a aucune cavité manifeste, côme aux optiques.

L'esprit naturel est engendré au foye, & reside en luy, & aux veines, moyennant lequel le foye fait sa sanguification, & autres operations naturelles : & par l'influence de luy, le foye conserue les vertus naturelles, implantées aux membres qui prouiennent de leur tēperamēt. Parquoy ainsi qu'il y a double chaleur naturelle implantée & influēte, aussi y a il doubles vertus naturelles aux mēbres, desquelles les implantées prouiennent de leur temperament, & les influentes du foye. Parquoy quand il

est dict selon l'auctorité de Galie,
qu'il y a aucuns membres qui ont
propres vertus , par lesquelles ils
sont gouvernez , ce doit estre en-
tendu quant à leur vertu naturelle
implantee.

Des choses appellees annexes des
choses naturelles.

Annexes sont,

Aage.

Couleur.

Figure.

Sexe.

Aages sont,

Infance.

Pueritie.

Adolescence.

Ieunesse.

Consistence.

Premiere vieillesse , qui est appel-
lee cruë & verde,

Derniere vieillesse:

Ces aages, qui font certaine partie de la duration de la vie humaine, peuuent estre reduicts en plus petit nombre que sept: comme pueritie, adolescence, ieunesse, consistance & vieillesse:

Couleur de cause interieure.

Dé bonne proportion des quatre humeurs, rosee.

D'excés d humeur melancholique, noire ou liuide.

D'abondance de colere, citrine.

D'abondance de phlegme, blanche ou palle.

Figure ou habitude de corps.

Quadrature, De bonne temperature:

Crassitude, D'excés de chaleur & humidité

Extenuation, De chaleur, &
siccité.

Obesité ou graisse, De froideur &
humidité.

Sexe

Masculin, Chaud.

Feminin, Froid.

Hermafrodite, composé des
deux, auquel l'usage est permis
du sexe plus apparent.

Outre la chaleur & froideur, qui
sont cause du sexe, il y a l'industrie
de nature: car il est possible trou-
ver quelque femme de plus chau-
de température que quelque hom-
me, selon Galien au liure de *pul-
sibus*.

Annotation.

Icelle difference de sexe, n'est
que difference accidentale, & de-
position des parties: car selon Ga-

lien au liure de *Vsu partium*, autant de parties & telles a la femelle que le malle, différentes de seule situation, & quelque peu en figure, comme par luy est deduit & prouvé.

Des choses non naturelles.

Choses non naturelles, sont choses qui aduiennent au corps exterieurement: mais ineuitablement ayans vertu de conseruer santé, ou faire maladie.

Choses non naturelles sont,

L'air qui nous enuironne.

Mouuement & repos.

Boire & manger.

Dormir & veiller.

Inanition & repletion.

Les passions ou accidens de l'ame.

La varieté des qualitez de l'air

provient des

Regions. vents.

Situations de lieux.

Apparitions ou absconsemens
de certaines estoilles, qui sont
cause des mutations notables
en l'air sous lesquelles sont con-
tenues les quatre parties de
l'an.

Region,

Intemperee.

Temperee, côme le pais d'hip-
pocrate.

Region intemperee,

Chaude comme Lybie.

Froide comme Scythie,

France, Germanie.

Seiche.

Humide.

Vent, est vne exhalation de la
premiere nature chaude & seiche.

à la Chirurgie Dogmatique. 95
qui a son mouuement par l'air lat-
teralement.

Les vents principaux ou cardi-
naux sont.

Subsolanus, venant d'orient, qui
est chaud & sec.

Fauonius, d'occidēt qui est froid
& humide.

Auster meridional, chaud & hu-
mide, & putrefactif.

Boreas, septentrional, froid, sec,
& prohibant putrefaction.

A chacun desdicts vents Ari-
stote assigne deux collatéraux,
parquoy sont tous en nombre de
douze. Aucuns les diuisent en
seize, & les autres en plus grand
nombre, comme trente deux,
pour l'vsage de la nauigation, qui
sont nommez par noms des mari-
niers.

Situation de lieu.

Vers midy.

Vers orient.

Vers occident.

Vers septentrion.

Pres la mer.

Pres les lacs, estâgs, marests,
riuieres.

Les qualitez de la terre sont.

Pierreuse, Froide & seiche.

Fangeuse, Froide & humide.

Crasse, Chaude & humide.

Argilleuse, Chaude & seiche.

Les quatre parties de l'an sont,

Printemps, Temperé,

Esté, Chaud & sec.

Automne, Sec, & quant à cha-

leur & froideur, in-

egal.

Hyuer, Froid & humide.

Il ne faut receuoir l'opinion des

Almachis

Almachistes, qui diuisent l'an en quatre parties egales, & à chacune attribuent trois mois: car le printemps, selon Galien & Hippocrate au premier liure des Épidemies, n'a deux mois cōplets: mais ceste speculation si exacte n'appartient aux chirurgiens.

Des alimens.

Aliment, est chose qui augmente nourrit & nostre corps.

Aliment.

Euchyme, qui engendre sang temperé.

Cacochyme, qui engendre sang, auquel l'un des quatre humeurs surmonte la proportion de la masse sanguinaire temperée, & bien proportionnée.

Aliment cacochyme.

Bilieux.

Phlegmatique.

Melancholique.

Breuvage.

Delatif seulement, eau.

Delatif & nutritif, vin.

Les passions de l'ame.

Ioye.

Tristesse.

Crainte.

Ire.

Anxieté.

La raison pour laquelle les choses dessusdictes sont appellees passions de l'ame, est par ce que par icelle l'ame souffre, & sont principalement & premierement fondees en elle, comme les qualitez corporelles au corps. Et si lesdictes passions font quelque transmutation au corps, ce prouient

pour la colligance. & consentemēt mutuel, qui est entre le corps & l'ame, comme dit Aristote parlant de la Physionomie. Tout ainsi que les affections corporelles & qui principalement sont fōdees en la temperature du corps, comme santé, maladie, chaleur, froidur, induisent l'ame à consentement, comme il appert en l'homme eschauffé de mouuement, de vin, ou autrement, qui est plus prompt à ire, que autrement disposé, lequel aussi est vne fois plus misericordieux, plus hardy ou craintif de la mort, ou autres choses que l'autre, selon la diuersité des dispositions corporelles, & des humeurs estans en iceluy.

La nature desdites passions euoque ioye, amaine la chaleur natu-

relle du cœur à la superficie du corps.

Tristesse & crainte reuoquent la chaleur naturelle interieurement vers le centre du corps, mais en diuerses manieres: car crainte la reuoque subtilement dedans le cœur, en sorte que aucunesfois par son subtil retour en iceluy, elle suffoque la chaleur naturele & vertu vitale, dont s'ensuit mort. Mais tristesse reuoque lentement la chaleur interieurement.

Ire, est vne ferueur de sang & esprits vitaux, faicte au cœur, de laquelle l'accessoire est appetit de vengeance. De la connoissance de de la nature de ces passions, on peut deduire la raison, pour laquelle les femmes meurēt plustost de loye que les hōmes, qui sont de

à la Chirurgie Dogmatique. 101
cœur viril : car vn homme ayant
le cœur effeminé, porroit mourir
de ioye cōme la femme. Vn cœur
dōcques de nature froide, a moin-
dre quantité d'esprits que le chaud:
parquoy quād il est dilaté par el fo-
ye, ils s'espādent hors de luy, par-
quoy il est destitué d'iceux, & par
consequent de sa vertu. Ce qui ne
peut ainsi aduenir au cœur chaud
& viril, à raison de la force de la
vertu vitale, & de l'abondance des
esprits vitaux. Et par l'opposite,
tristesse fait plustost mourir l'hom-
me que la femme : car l'homme a
le cœur plus chaud, & par tristesse
la chaleur est reuoquee lente-
ment dedans iceluy, qui le desse-
che & eschauffe de chaleur con-
tre nature. Vray est toute fois que
excessiue tristesse porte incommo-

dité à la femme. Et si quelquefois
 à duiēnent deux passiōs cōtraires
 à l'homme tout en vn temps selon
 diuers obiets, en luy aura mouue-
 mens cōtraires d'esprits, & de cha-
 leur: car combien que selon la spe-
 culation de philosophie vniuersel-
 le, il soit impossible qu'vne chose
 soit meüe de deux mouuemens cō-
 traire, toute fois parlant medica-
 lement, il est possible qu'vne chose
 ayt deux mouuemens contraires,
 comme prouue Galien au liure de
usu partium: pourquoy en l'homme
 ayant en vn temps passiōs contrai-
 res, les mouuemēs desdites passiōs
 seront confus en vn.

Des choses contre nature.

Choses contre nature sont cho-
 ses contraires à nature.

Choses contre nature sont,

Maladie.

Cause de maladie.

Symptomes ou accident de
maladie.

Maladie, est vne constitution ou
disposition contre nature, qui im-
mediatement fait lésion manife-
ste aux operations.

Au contraire:

Santé est vne constitution selon
nature, rendant les actions du
corps humain parfaites.

Maladie,

Similaire.

Organique.

Commune, qui est solution de
continuité.

Maladie similaire.

Simple.

Composée.

Maladie similaire simple.

Chaude.

Froide.

Seiche, humide.

Maladie similaire composee.

Chaude & humide.

Chaude & seche.

Froide & humide.

Froide & seche.

Item maladie similaire.

Vniuerselle, comme fièvre.

Particuliere, comme froideur
de l'estomach.

Materielle, qui est avec humeur
superflu.

Immaterielle, sans humeur su-
perflu, comme inflammation,
appellée par Galien seche.

Maladie organique.

En forme.

En magnitude.

En nombre.

En positure.

Maladie en forme.

En figure , comme si ce qui doit estre droit, est fait oblique.

En cauité, comme si les meats sont constipez ou estoupez.

En asperité & lenité , comme si ce qui selon nature doit estre poly, est raboteux , comme l'artere trachee , qui quelque fois est exasperée par fluxion d'humours.

Maladie en nombre.

Abondant.

Defaillant.

Maladie en nombre abondant ou superflu.

1. Du genre des choses naturelles, de laquelle la cause est multitude de bonne matiere , comme quand y a six doigts à la main.

2. Du genre des choses contre nature , comme pierre en la vessie, vers aux intestins, polypus au nez.

Maladie en nombre defaillant.

Par ablation totale d'une partie.

Par ablation non totale.

Maladie en magnitude.

En la premiere formation.

Après le part.

Maladie en magnitude , & en la premiere formation.

Quand la partie ou tout le corps est moindre.

Quand elle ou tout le corps est plus grand qu'il n'appartient.

Maladie en magnitude après le part.

Par croissance excessive, De quelque partie ou de tout le corps.

Maladie en position.

En posture.

En copulation.

Maladie en posture.

Luxation d'articles complete ou incomplete.

Enterocoele. Complete ou incomplete.

Epiplocoele. Complete.

Maladie en copulation.

Par relaxation de ligament, comme en la procidence de la matrice.

Partension de ligament, comme sous la langue, ce qui vulgairement est dit le filet.

Maladie commune, ou solution de continuité :

En partie similaire.

En partie organique.

Solution de continuité en partie similaire.

En l'os fracture, dite des

Arabes, algebra.

En la chair, vlcere.

Au nerf, ruption, ou spasma.

Au ligament, apospalma.

Solution de continuité en partie organique, est dictée avulsion.

Des causes.

Cause est à l'estre, de laquelle s'ensuit autre chose: ou selon Galiē, cause est vne chose qui à quelque effect peut donner aucune partie de la generation.

Cause selon les philosophes.

Materielle.

Formelle.

Efficiente.

Finale.

Autre diuision de cause.

1. Procatartique, ou primitive.

2. Antecedente.

3. Concause.

4. Cooperatiue.

5. Conioincte.

6. Par soy.

7. Par accident.

8. Cause, *sine qua non*.

9. Mediate.

10. Immediate.

Cause primitive, est celle qui fait le commencement, puis elle se absente, comme ire, chaleur, froideur, dont seroit prouenuë fièvre.

Cause antecedente, est celle qui est induicte de la cause primitive, comme abondance de sang d'aliment copieux.

Cause concause, est celle qui seule peut faire maladie, laquelle toutefois elle fait avec autre cause, comme pierre estant en la vessie, avec vlcere peut faire difficul-

té d'vriner laquelle elle pourroit faire seule.

Cause cooperatiue , est celle qui seule ne peut faire vn effect: mais elle le peut faire aidee d'autre cause, comme debilité de iointure, ne peut faire maladie qu'articulaire seule : mais elle la peut causer avec superfluité d'humeurs.

Cause conioincte , est celle par la presence de laquelle la maladie est, & quand elle est absente la maladie cesse. Cause par soy , dictée en Latin *Causa per se* , est celle qui est ordonnée à quelque effect , & est exprimée, ou nommée par vn nom , denotant la raison par laquelle elle fait son effect : comme chaleur est cause d'eschauffer : & la chose lucide, de produire lumiere.

Cause par accident , est celle

qui n'est ordonnée à l'effet qu'elle produit, ou qui n'est exprimée par vn nom portant la raison pour laquelle elle produit son effet, cōme froideur eschauffe par accident; & chaleur est cause d'esleuer en haut vne chose aussi par accident, & ce prouient par l'intervention d'une autre cause: car le froid eschauffe en faisant occlusion des pores, qui empesche l'issuë de la chaleur, & le chaud esleue, par ce qu'il rarifie. Aussi quād vn effect prouiet d'une cause qui n'est ordonnée pour iceluy, elle est cause de luy par accident: cōme faire vne fosse pour planter vn arbre, est cause de l'inuention d'un thresor. Toutefois quelquefois selō Galien, cause par accidēt, est prinse pour cause mediate, & cause par soy, pour cause immediate.

Cause immediate, est celle entre laquelle & son effect il n'intervient autre cause.

Cause mediate, à l'opposite.

Des symptomes ou accidens.

Symptome.

Generalement.

Proprement.

Symptome generally, est tout ce qui contre nature aient à nostre corps. Sous ceste acception, maladie & toutes les choses non naturelles sont contenues sous symptome.

Symptome proprement ou spécialement, est vne chose contre nature suivant la maladie, comme rougeur, pulsation, douleur, tension, sont symptomes du phlegme.

Symptome proprement.

Affection

à la Chirurgie Dogmatique. 113

Affectiō contre nature.

Actiō viciee.

Consequent & dependent des
deux comme retention immo-
deree d'excremens.

Item symptome.

Necessaire comme fièvre en
pleuresie le plus souvent auenant,
comme conuulsion en poincture
de nerf.

Indiferent, comme tous en fié-
vre,

Rare comme syncope en fié-
vre.

Ainsi on peut appeller sympto-
me de santé, comme bon appetit
ou bonne couleur.

Annotation.

Combien que symptome pro-
prement soit affectiō contre na-
ture suyuant la maladie, comme

l'ombre le corps : toutefois extendant sa signification largement, il est encore double.

De santé, comme bonne couleur, bonne concoction, bon appetit.

De maladie, comme est maintenant predict.

Parquoy selon ceste maniere de parler, aussi que symptôme de maladie est vne chose contre nature, suivant icelle.

Et par ce que le plus souvent les causes sont connues par leurs effets, par la cognoissance que les Logiciens appellent postérieure, & que symptôme est effet de maladie, ainsi que maladie est effet de la cause : à ceste raison les symptomes nous induisent à la cognoissance des maladies, &

lors il ne sont seulement appellez
symptomes, mais signes de mala-
dies. Parquoy chacune maladie a
certaine collection, ou concours
de symptomes, par laquelle elle
est connue & iugee. Mais il faut
noter que quand les auteurs ont
descriit la collection des sympto-
mes de quelque maladie, ils ont
descriit lesdicts symptomes d'icel-
les maladies estans en leur force &
estat: car quelque fois en leur cõ-
mencemẽt elles n'ont tous lesdicts
symptomes apparens: parquoy
Galien compare avec raison les
plantes aux maladies, & les mede-
cins aux iardiniers: car comme les
arbres ou herbes naisans de terre
n'ont tous les signes qui sont de
leur description, comme fleur,
fruiit, semence: aussi les maladies

en leur naissance n'ont tous les signes qui par après sont veus en elles en leur accroissement ou estat: parquoy ne sont lors connus, sinon des Medecins experimentez & de bon iugement. Suiuant ceste theorique, si quelque maladie n'auoit les signes par lesquels sa maladie doit estre conneuë, le Medecin qui dira le malade n'auoir icelle maladie, ne sera à blasmer: mais si blasme y auoit, plustost seroit-il au cas particulier, qui ne peut estre redigé en art, qui est des choses qui auiennent tousiours, ou le plus souuent, & neglige les choses rares, comme choses qui ne peuvent estre reglees par certains theoremes: parquoy pour l'inconstance des choses particulieres & indues, les sciences &

à la Chirurgie Dogmatique. 117
ars de ne descendēt iusques à icel-
les, combien que la pratique, &
application de leurs theoremes
soit es choses particulieres.

F I N.

K iij.





A P O L O G I E P O V R L E S Chirurgiens.

*Contre ceux qui publient qu'ils ne se
doivent mesler de remettre les
os rompus & desmis.*



LE vulgaire depuis
quelques années
tient vn e opinion,
que ie dois avec
verité, plustost no-
mer erreur populaire, que les
Chirurgiens ne se doivent in-

gerer de remettre les os rompus ou desmis , & qu'il faut renvoyer toute ceste pratique à ceux qu'on appelle renoüeurs, rabilleurs, restaurateurs. Je me suis tousiours moqué de cela, & en plusieurs bonnes compagnies ay souuent fait voir le contraire, fondé sur des raisons assez viues, & sur l'experience ordinaire. Mais ayant recogneu en ce voyage de Sauoye , que j'ay fait avec sa Maiesté , que quelques vns vouloient donner autorité à ceste opinion , & s'en seruit comme d'une loy , la faisant tout doucement glisser parmy les seigneurs de ceste Cour. J'ay pensé qu'il estoit necessaire de faire voir au public , combien sont foibles les fondemens sur

lesquels elle est appuyee. Necessaire (dis-je) pour l'honneur de toute la Chirurgie, & pour ma deffence particuliere. Toute la Chirurgie y a interest, pource qu'on veut oster & eclipser de sa iurisdiction, deux de ses plus belles parties, qui sont les fractures & luxations: parties si nobles, que les plus grands Medecins & les plus celebres auteurs qui ont escrit de la Chirurgie, se sont pleu à l'esclairer & amplifier. Quant à moy, outre ce qui est du general estant du corps, & faisant profession de la Chirurgie, i'y suis poussé par des raisons particulieres: on m'a voulu calomnier & accuser de temerité & d'imprudence, pour avoir en la presence d'un renouëur

osé remettre vne iambe rompue, ie desire qu'un chacun voye que ie le pouuois & deuois faire : & afin qu'on en sache le subiect, ie raconteray fidellement & en peu de mots la verité de ce qui s'est passé.

Sa Majesté ayant le seiziesme du mois de Novembre, remis le chasteau de Montmeillan en son obeissance, sur l'aduis qu'il eust que le Duc de Sauoye, avec son armee descendoit le mont sainct Bernard, se resolt de luy aller au deuant, & avec vn temps extremement froid, s'achemine à la Roche, & de là s'en va recognoistre l'armee ennemie, qui estoit logee, & comme retranschee dans vn vallon inaccessible, où ayant seiourné quelque iour, y

laissa Monseigneur le Comte de Soissons, avec le sieur de Lesdiguières, & vne bonne partie de son armée, & se resolut de s'en aller à Beaufort, qui est vn autre passage par où l'on pouuoit attaquer l'ennemy, où estoient logez Monseigneur de Montpensier, & Monsieur le Duc d'Espèron, avec l'autre partie de l'armée. Ceste iournee fust fort longue & ennuyeuse à vn chacun, pour l'incommodité du chemin qui estoit fort estroit, & extrêmement glissant, accompagné de precipices effroyables, de sorte qu'on estoit contraint d'aller la pluspart du temps à pied. Or entre autres le Seigneur de Sourdeac, homme assez cogneu en ce Royaume, tant pour le rang

de sa maison, que pour les services signalez qu'il a fait à ceste Couronne, & qui est pour ceste occasion fort aymé & fauorisé de sa Maïesté, voulant fuire de pres le Roy, par vn malheur cheut sous son cheval, & se rompit la jambe. On cria de tous costez au secours, chacun recherche & appelle Martel, on le conduit avec beaucoup de peine au logis. Là se treuvent vn peu apres M. l'arrest chirurgien du Roy, & vn renouueur. I'y accours à ce bruit, & ayant receu le commandement de sa Majesté de le panser, que m'apporta le Sieur du Laurens son Medecin ordinaire, ie commence à faire mon appareil, & dis aux deux autres qu'ils couplassent la botte & descou-

urissent la iambe, le tout estant
preparé ie m'approche pour re-
cognoistre la fracture, ie treuve
que les deux os estoient rompus
au bas assez pres des chevilles, &
comme ie me disposai à panser le
malade & remettre la fracture,
le renouëur me dit tout haut que
ie m'oste de là, & que ce n'est
point mon mestier. Je replique
que ie le scay & dois faire: &
apres auoir vn peu contesté à
mon grand regret, au preiudice
du malade, & à la veuë de plu-
sieurs assistans, ie remets fort bien
la fracture. Sur ceste dispute &
contention le bruit court par tout
que i'ay tort, & vient iusques aux
oreilles de sa Majesté. Voilà la
verité de ce qui s'est passé. Qu'vn
chacun donc iuge par là, si estant

le plus vieux de la compagnie en-
uoyé de la part du Roy, & en ayāt
eu le cōmandement expres, estant
depuis tant d'annees experimen-
té en ceste matiere, ayant guery
vne infinité de fractures, tant sim-
ples qu'auēc playe, si dis-ic, ce n'e-
stoit pas de mon deuoir de remet-
tre la fracture dudit Seigneur de
Sourdeac, & cependant plusieurs
se sont scandalizez de ce qu'un
renouëur estant present, i'ay vou-
lu faire ceste operation, croyans
qu'il n'appartient qu'aux seuls
renouëurs de remettre les os
rompus ou desmis. Je veux main-
tenant faire voir à vn chacun
que les Chirurgiens doiuent &
peuent aussi bien remettre les
fractures & luxations que ces ra-
billeurs.

La Chirurgie estant vne des plus nobles & belles parties de la Medecine, tant pour sa certitude (car ses operations sont assurees) que pour auoir esté du temps des Grecs, exercee par les Princes & grands Seigneurs, a vne fort grande estenduë, & contient beaucoup plus de choses que le vulgaire ne s'est imaginé. On la diuise ordinairement en cinq parties. La premiere traite des tumeurs que le commun appelle apostemes, qui sont maladies en grandeur & quantité augmentee. La seconde est des playes, qu'on definit solution de continuité recente & sanglante faicte aux parties molles. La troisieme des vlceres, la quatriesme des fractures qui appartiennent aux os, & la derniere des luxa-

tions , quand les os sont hors de leur place & situation naturelle. Puis donc que ces deux parties sont comprises dans l'estenduë de la chirurgie , & ont besoin de l'operation manuelle , pourquoy est-ce qu'on les voudra aujour-d'huy bannir de la iurisdiction du Chirurgien?

C'est vne chose toute asseuree que les plus celebres auteurs qui ont escrit de la chirurgie , ont tousiours fait vn traicté particulier des fractures & luxations. Hippocrate en a fait des liurës si admirables que i'ay souuent ouy dire à de grands personnages que ce sont les plus parfaicts , & les plus accomplis de tous les siens. Car auãt que parler de l'os rompu ou desmis, il fait vne belle description de

los, & enseigne quelle est la forme, situation, grandeur, connexion, montrant par là que quiconque se veut mesler de remettre les os, doit auoir vne parfaicte cōnoissāce de leur nature. Apres cela il explique toutes les differences des fractures & luxations, & en fin il enseigne les moyens de les remettre. Ces liures ont esté trouuez si beaux que Galien qui a esté vne seconde lumiere en la Medecine, les a voulu esclaircir & illustrer de beaux commentaires qui ont esté reueus par Vidus Vidius, & depuis mis en langue François, pour estre publiez parmy tous ceux qui font profession de la chirurgie. Je demanderois volontiers si ces liures sont parti-

culieremēt dediez aux renoüeurs.

Ne les lit on pas ordinairement aux escholes de chirurgie & pour quel autre subiect , sinon pour leur apprendre la façon de remettre les os?

Dauantage pourquoy est-ce que dans nos cabinets nous tenons des scelets qu'on appelle anatomies seches? Pourquoy est ce que nos Docteurs prennent la peine de nous lire , & interpreter le liure des os , si ce n'est pour nous apprendre les maladies qui arriuent aux os , & les moyens de les guerir? Galien tout au commencement du liure des os , a fort bien expliqué cela. Il faut dit-il, que le Medecin ayt vne particuliere cognoissance de la nature des os , de leur quantité

& qualité, car comment pourra-t-il remettre vn os en sa place, s'il ne sçait quelle est la situation naturelle? Tout ce qui est en la Medecine (dit il) a pour but ce qui est selon nature. Qui doncques pourra mieux remettre les os, & guerir leurs maladies, que ceux qui ont vne parfaicte cognoissance de leur nature, i'entens de leur figure, quantité, substance, situation, connexion, articulation, parties, comme apophyses, epiphyses?

J'adiousteray encore vne autre raison, que si le Chirurgien traicte les fractures compliquees avec playe, tumeur, vlcere, il peut à plus forte raison, & avec plus de facilité panser les fractures simples: or est-il qu'aux grands fracas des os qu'il se font des coups

de pistolets, d'arquebuses & du canon mesme, on n'a recours qu'aux bons Chirurgiens. Nous l'auons veu en la personne de Monsieur le Baron de Terme, au siege de la Feire, qui eust vn coup de canon à la iambe, qui luy brisa tous les os. on ne courut point aux reuoieurs, on vint à nostre secours, & fust tres-bien pansé par Monsieur Portal, premier Chirurgien du Roy, & par moy avec l'assistance de Messieurs de la Riviere & du Laurens.

Je sçay bien qu'on pourra alleguer que la Chirurgie ayant plusieurs parties, & ne pouuant estre exactement cognüe & pratiquée en toutes, par vn homme seul, il est plus raisonnable de laisser les tumeurs, vlcères &

playes aux Chirurgiens , & les fractures & luxations aux re-
noüeurs. Ainsi me souuiens auoir
leu & ouy dire autrefois que les
Chirurgiens & Operateurs estoient
distinguez selon la diuersité des
parties du corps. Les vns se mes-
loient seulement de guerir les
yeux & estoient nommez oculi-
listes , les autres s'amüsoient à
refaire les nez , comme encore
pour le iourd'huy en Calabre il
y en a qui ont ceste seule prati-
que en v'sage , les autres s'adon-
noient à tirer la pierre de la ves-
sie , & de ceux la parle le diuin
Hippocrate , en son serment so-
lennel , protestant de ne s'en mes-
ler iamais , mais d'en laisser tou-
te la pratique à ceux qu'il ap-
pelle experts. Il semble donc

que ceste cognoissance de remettre les os rompus ou desmis, appartient plustost aux artisans particuliers qu'on nomme re-
noueurs, qu'aux Chirurgiens qui sont assez empeschez à apprendre les autres parties de la Chirurgie.

Mais ie leur respondray en vn mot qu'il est aujourd'huy autant necessaire au bon Chirurgien, de traicter vne fracture, comme de panser vne apostume ou vne playe, ma raison est toute claire. La Chirurgie a esté fort chérie & esteemée des Rois & grands Seigneurs, pource qu'elle leur apportoit du soulagement aux blesseurs, & du temps de ce siege tant renommé de Troye, Podalyrius & Machaon, ont esté fort

honorés, pource qu'ils se mesloient de panser les playes, de sorte qu'il semble que la plus noble partie de la Chirurgie, & qui fait plus rechercher le Chirurgien, soit celle qui traicte les playes. Or est-il que la plus part des playes & blessures que nos soldats reçoivent aujourdhuy aux armées, estant faites par des bastons à feu, sont accompagnées de fractions & briseures d'os. Il faut donc que le Chirurgien aye la cognoissance parfaite des fractures, ou bien qu'il mène toujours en croupe & qu'il tienne vn renouëur pendu à sa ceinture, à fin que l'un remette la fracture & l'autre pansé la playe.

Mais qu'est-il de besoin d'alléguer toutes ces raisons, veu que

l'experience ordinaire nous sert
d'un tesmoignage tres-assuré.
Combien y a il de Chirurgiens en
France qui sçauent fort bien re-
mettre vne fracture, & qui ont
vne parfaicte cognoissance des
bandages, qui est le point princi-
pal de ceste pratique. Il ne seroit
point seant que ie misse moy-mes-
me en auant vne infinité d'expe-
riences que i'ay faictes sur des bras
& des iambes rompues sans pla-
ye, & avec playe, les enuieux peur-
estre n'y adiousteroient point de
foy. Je me contenteray d'alle-
guer deux histoires arriuees en
mesme temps & à la veüe de toute
la Cour, pour confirmation de
mon dire. Le seziésme iour de
Nouembre le Roy estant party de
Mont-meillan avec vn temps ex-

tremement froid , les chemins estans fort glissants, le Baron de la Glette lieutenant de la compagnie de Monsieur le Duc d'Eguillon, tomba & se rompit le bras tout net, nonobstant cela il ne laissoit pas de suiure sa Maiesté, pour l'enuie qu'il auoit de le seruir sur le bruit qui couroit par tout de la bataille, mais sa Maiesté en estant aduertie, luy commanda de se retirer & de se faire panser: on cherche des Chirurgiens par tout. Je me rencontraý là de bonne fortune, & pensant prendre vn sac de cuir plein de remedes, que ie porte ordinairement à l'arçon de la selle, pour les accidens soudains qui peuuent arriuer, ie treuve que quelque bon compagnon l'auoit emporté, croyant qu'il

qu'il y eust quelque chose de meilleur. Je ne demeure point pour cela court, ie fais promptement coucher le malade à terre sur des manteaux, ie prends vne vieille seruiette qu'un des siens portoit pour en faire des bandes & des compresses. Je me saisis d'une bouteille de gros vin, qu'un valet portoit, & ayant trempé mes compresses dans ce gros vin (car d'attendre du vinaigre & de tous ces astringens qu'on a accoustumé d'vser, il n'y auoit point d'apparence estant elloigné de tous secours) ie pansis fort bien le bras, & n'ayant point d'esclisses ie fis soudain rompre le fourreau d'une espee, & pour le reste des bandes ie me seruy de iaretieres. En fin i'e-

say de telle industrie, & remis si bien ceste fracture qu'il s'en alla à Chambery, sans sentir aucune douleur, & pource que ie luy auois conseillé de faire voir son bras à vn honneste Chirurgien dudit lieu, il ne manqua pas de le luy monstrier. Ledit Chirurgien luy ayant demandé s'il y sentoit quelque douleur, & ayant sçeu du malade qu'il n'en auoit point, fust d'aduis qu'on n'y touchast point: en fin ledit Baron seiourne quelques iours, & voulant s'en aller à Lyon, le Chirurgien fust d'aduis de faire le second appareil. Ayant donc descouuert le bras, & le voyant tout vny, il croyoit qu'il n'y auoit point eu de fracture, & si le Gentilhomme ne l'en eust asseuré, il en eust aucunement douté. Voi-

ia comme en pleine campagne, desnué de tous secours & des remedes ordinaires, i'ay fort bien remis ce bras rompu. L'autre histoire est de mesme temps, cest à dire quatre iours apres le Sieur de Sourdeac, s'estant rompu la iambe, comme i'ay desia dit, i'eus cōmandement de sa Maicsté de l'aller panser. Je la remis fort bien & au bandage, i'y apportay quelque chose de particulier, car ie me mocque de ces rabilleurs ordinaires, qui ayant mis la iambe en vne posture, veulent contraindre le malade de ne la bouger jamais d'un lieu: ie les accommode de façon qu'il leur est loisible de remuer la iambe & la tourner tantost çà, tantost là: & en cela i'apporte beaucoup de soulagement

au malade. Je m'en ris aussi de ceux
la qui pensent, quand on a remis
vne fracture, si le malade sent
quelques douleurs, que la fractu-
re n'est pas bien remise : & quoy
ne voyent-ils pas ordinairement
qu'une simple cheutte, vne legere
contusion, si elle se fait aux par-
ties sensibles, nerueuses & mēbra-
neuses à accoustumé d'apporter
de grandes douleurs : pourquoy
donc là où outre la contusion il y
a vn fracas des os, ne sentira quel-
que fois le malade des douleurs
extremes, encore que la fractu-
re soit bien remise ? Or pour reue-
nir à mon propos ayant pansé
ledit Sieur pour le premier ap-
pareil, on ne fut pas d'aduis d'y
toucher que le iour qu'il vou-
lust partir pour s'en aller. Là se

trouuerent les Sieurs de la Riniere , premier Medecin de sa Maiesté , recogneu par tout ce Royaume pour sa rare doctrine & singuliere experience , & du Laurens Medecin ordinaire , qui par ses graues discours , & par ces beaux escrits est assez cogneu par tout. Lesdits Sieurs disie , ayans veu la iambe debandee , & voyant l'esgalité qui y estoit , iugerent tres-bien qu'elle auoit esté bien remise , & ne furent pas d'aduís qu'on ostant le premier deffensif , qui estoit d'un linge bien deslié : de sorte qu'on rebanda là dessus , & mist-on l'apresdinee ledit Sieur de Sourdeac en chemin , qui depuis s'est bien porté , & espere que dans peu de iours il commencera à marcher.

Je pourrois mettre en auant vne infinité d'autres histoires, & telles pratiques que j'ay faictes, & entre autres de deux qui eurent le bras rompu par deux fois, la seconde fracture s'estant faicte sur le calus qui estoit encore fort mol, & tel qu'on l'eust peu couper avec le rasoir, il fallut bien apporter de l'inuention & de l'artifice extraordinaire, cependant avec l'aide de Dieu ie les guery fort bien. Vn chacun donc peut cognoistre par ce discours qu'un bon Chirurgien qui a la cognoissance de l'Anatomie, doit & peut aussi bien panser les maladies des os, que font les renoüeurs, qui sont bien souvent ignorans. Et quand le plus habile Chirurgien de France auroit bien remis vne fracture, s'ils y mettent

la main, ils treuvent tousiours qu'il
ya quelque petit osselet qui n'est
pas bien remis. Je raconteray sur
ce subiect vne histoire plaisante
que i'ay veu. Il y a quelques annees
qu'un Gentilhomme de Norman-
die tomba de son cheual, & se fit
vne grande contusion vers les che-
uilles du pied, sans toutefois qu'il y
eust ny fracture, ny dislocation:
ie pansay ce Gentil-homme avec
tout le soing qu'il me fust possible,
& ne peus si bien faire, que la dou-
leur ne le trauaillat vn mois durât,
quelques vns de ses voisins voyant
la longueur du mal, luy mettent
en fantasie qu'il falloit auoir vn re-
nouëur qui estoit au païs, & que
l'os deuoit estre rompu ou démis.
Je fus aduerty du tout par le Gen-
tilhomme mesme, & apres l'auoir

assuré sur mon honneur qu'il n'y auoit point de mal à l'os, ie fus d'aduis qu'on fist venir ce renoüeur: & pour faire cognoistre la suffisance, ie prens l'autre iambe du Gentil homme, ie la bande & mets vn grand emplastre sur la cheuille, luy disant qu'il feignist d'auoir son mal là. Mon homme arriué, desbande la iambe, oste l'emplastre & commēce à secouer la teste, disant qu'il ne s'estonnoit pas s'il auoit de si grandes douleurs, veu qu'il y auoit deux petits os qui estoient hors de leur place. Le Gentil-homme le prie d'y aduiser bien de pres, d'autant que Martel l'auoit fort assuré qu'il n'y auoit rien de démis ny de rompu, il replique que si, en fin l'impatience prend ce Gentil-ho-

me & commence à dire à l'autre qu'il estoit vn affronteur, & le fit chasser de là. Voyla comme il y a de l'abus par tout . Je n'entends pas pour tout cecy taxer les habiles renoüeurs , i'en cognois à Paris, à Roüen, & en plusieurs autres lieux de fort experimentez, & auxquels ie m'asseurerois bien. Je ne parle que de ces glorieux & nouveaux venus, qui ne pensent rien de bien fait que ce qui a passé par leurs mains. Et pour conclurre ce discours, ie soustiens contre tous ceux qui m'ont voulu calomnier, que ie n'ay point temerairement ou imprudemment fait de remettre la iambe de Monsieur de Sourdeac, en la presence d'un renoüeur, d'autant que i'estois fort assuré de le pouvoir bien faire,

& que la Majesté me l'auoit commandé. Le succès qui est tres-heureux en rend vn assuré tesmoignage.

*Paradoxes tres-Veritables sur
la pratique de Chirurgie.*

DEpuis le temps que ie commence à pratiquer ie confesse auoir fait vne infinité de fautes, pource que ie faisois comme les autres, & me fondois sur ceste vieille erreur qu'il faut suivre le grand chemin des vaches: mais la longue experience m'ayant rendu sage, ie me suis retiré de tout plein d'opinions que la pluspart des Chirurgiens tiennēt pour le iourd'huy, & pource que nous ne sommes pas seulement nays pour nous,

ie penſerois faire tort à la poſte-
rité ſi ie ne leur deſcouvrois ce
qu'en prattiquant, i'ay trouué tres-
veritable. Je mettray donc quel-
ques ſentences en auant que i'ap-
pelle Paradoxes pour eſtre eſloi-
gnées de l'opinion vulgaire.

Premier Paradoxe.

Les playes de teſtes ne doi-
uent eſtre ſi ſouuent deſcou-
uertes.

Explication.

La pratique ordinaire eſt de
deſcouvrir la fracture qui eſt
à l'oſ de la teſte auſſitoſt qu'il y en
a quelque apparence, on fait vne
grande incifion en croix, & deſ-

couure on de l'os plus qu'il ne faut. Apres on a accoustumé de descouurir, c'est à dire de panser vne ou deux fois le iour les playes de teste. Je dis que la fracture simple de la teste se peut guerir sans estre decouverte, & que le moins qu'on peut penser les playes de teste, c'est à dire les monstrier à l'air, c'est le meilleur. Ce sont deux points que ie veux prouuer: quant au premier ie dis que comme aux autres os vne simple fente, sans qu'il y ait playe à la chair, se remet par l'aide seule de la nature, aussi aux os de la teste pourueu que rien ne presse la dure mere, la simple fracture se remettra & qu'il ne sert de rien de la descouurir ny de faire vne incision. Hippo-

crate semble confirmer ceste opinion en son liure des playes de teste, & Vidus Vidius aussi en son commentaire, comme fait aussi vn Medecin Italien nommé Arceus, ie l'ay souuent pratiqué & m'en suis bien trouué. A Rouën vn garçon de la cuisine du Roy, eust vne grande fracture à la teste, tous mes compagnons estoient d'aduis de decouvrir l'os, i'opiniastray seul au contraire, & mis seulement vn bon emplastre sur la teste, que i'y laissay huit iours entiers sans le bouger. Il guetit parfaitement & se porte bien pour le iourd'huy. Quand à l'autre point ie dy qu'il ne faut point si souuent panser les playes, pource que lors que le medecament commence à faire

son effect tu l'ostes, & puis l'air extérieur offence merueilleusement les os, empesche la suppuration qui est vn ouurage de la seule chaleur naturelle, laquelle tu fais exhaler par ceste si frequente decouverte, empesche la regeneration de la chair, & du callus qui se doit faire.

Second Paradoxe.

L'Os de la teste descouvert, doit estre le plus promptement couuert qu'il se pourra & ne faut tousiours attendre l'exfoliation.

Explication.

C'Est vne erreur bien grande
d'attendre que l'os s'exfolie,
& de le charger de ces gros ron-
deaux de charpy qui sont durs
comme bois, ie dis qu'il le faut
promptement couvrir de sa chair,
& que plusieurs blesez meurent,
attendant que l'exfoliatiō se fasse:
Or i'enseigneray vn moyen prōpt
& assuré pour couvrir l'os, il faut
prēdre le trepan avec son aiguil-
le & faire plusieurs petits trous qui
penetreront iusques au diploe, tu
verras incontinent par ces petits
trous sortir & renaistre la chair qui
recouvrira ton os. l'ay souuent fait
ceste pratique, & avec vn heureux
succès. Et puis pourquoy veux-tu

que l'os s'exfolie tousiours s'il n'est gasté & alteré? ce qui l'altere & qui le noircit est l'air exterieur, & pourquoy le presentes tu si souuent à l'air? laisse-le, couuert de ton medicament, & le couure le plus promptement que tu pourras de sa chair. S'il est fort noircy & comme pourt y, i'aduouë qu'il le faut oster, pource que le vif & le mort qui different en'espece ne peuuent compatir ensemble: mais s'il demeure en sa blancheur esgalité & polissure, comme iu le peux faire demeurer, couure le quant & quand par l'artifice que ie t'ay enseigné.

Troisiesme Paradoxe.

LEs maladies des yeux qui sont
En grand nombre, se peu-

vent guerir par vn seul remede qui est le cantere appliqué derriere l'oreille.

Explication.

CEn'est pas sans raison qu'anciennement on auoit destiné des Medecins pour les yeux, & qu'aujourd'huy cela s'observe encore, on les nomme Oculistes, pource que l'œil est subiet à vne infinité de maladies qui passent bien le nombre de cent. Or la pluspart de ces maladies se font par defluxion, d'autant que l'œil est proche d'une grande source, d'une grande glande, i'entens le cerueau qui est le siege du froid & de l'humide, ayant la substance moelleuse, sa figure disposee

à recevoir & la situation haute l'œil d'autre costé est dur, temperemment froid, tout composé en ses principales parties d'eau, de verre, de cristal, de sorte qu'il reçoit aisément la décharge du cerneau : de là viennent les inflammations, les larmes continuelles, les brouillats & nuages qui courent la vue, la confusion & impureté des humeurs. Or ie dis que toutes ces maladies qui ont vne cause antecedente se guerissent par vn seul remede qui est le caustere. Je sçay bien que les anciens, & les modernes ordonnent vne infinité de collyres, eaux, pouldres, vnguens, mais ie suis de l'advis d'un vieux praticien, qu'il faut appliquer tous ces remedes avec le coude.

Le cautere euacue & destourne peu à peu ceste humeur superfluë qui se iette sur l'œil, de sorte que ce qui reste à l'œil, qu'on appelle en termes vulgaires, cause conioincte, est facilement dompté par la nature qui est celle (comme dit Hippocrate au second de ses Epidemies) qui guerit les maladies. Or ce cautere se peut appliquer en plusieurs endroits. Il y en a qui l'appliquent au dessus de la teste, vers la conionction des deux futures, les autres au derriere, entre la premiere & seconde vertebre: mais moy estant instruit par l'experience & les grandes pratiques que j'ay faictes & fais tous les iours, ie les applique au derriere de l'oreille, à ceste peti-

te cavité qui y est. Le Lecteur ne trouuera point, outre l'experien-
ce qu'il pourra faire quand il luy
plaira, mes raisons mauuaises. En
ceste partie, j'entends au derriere
de l'oreille, ou bien pres de la, na-
ture a logé de certaines glandes
pour receuoit la descharge du cer-
ueau, le commun les appelle emô-
ctaires, de sorte qu'aux maladies
du cerueau nous voyons que la
nature fait souuent des crises par
ceste voye là, faisant des tumeurs
qu'on nomme parotides. Le Me-
decin doncques qui est ministre de
la nature, & qui la doit imiter le
plus qu'il peut, doit pour la des-
charge du cerueau appliquer son
cautere auprès de cest emonctoi-
re. Dauantage il est tout certain
que les veines qui vont à l'exte

rieur de l'œil, du front, des temples viennent de la iugulaire externe, laquelle passe par derriere l'oreille, de sorte qu'appliquant le cautere bien pres de ceste veine, tu la descharge, & coupe le chemin à l'humeur qui monte. J'ay veu vne infinité de personnes qu'ôtenoit pour deplorees, qui auoient de grandes taves à l'œil, de chairs superflues qui leur couuroiēt tout l'œil, gueries par ce seul remede, les vniuersels toutesfois ayans precedé, lesquels ie laisse tousiours à messieurs les Medecins.

Quatriesme Paradoxe.

AVx playes d'harquebuse, & des bastons à feu, voire aux autres mesmes, il n'est pas bon

d'y mettre tousiours de tentes.

Explication.

LA pratique ordinaire est de mettre en toute sorte de playe de tentes, pour la tenir ouverte & empescher que la matiere ne se retienne. Mais moy au contraire ie tiens que les tentes seruent plustost d'empeschement, & apportent de grands accidens qui rendent apres les playes plus difficiles à guerir. Premièrement ces grosses & dures tentes, fermans entierement l'orifice de la playe, empeschent que la matiere ne sorte, & qu'il ne se face aucune exhalation des vapeurs pourries, de sorte que la matiere croupissant, fait bien

souuent des sinuosités aux parties saines, outre cela il arriue, que ces grosses tentes faisant dilatatiō des parties blessées, qui sont bien plus sensibles que les saines, pource qu'elles sont despoüillées de leur couuerture naturelle, qui les defendoit des iniures externes, ces tentes dis-ie causent de grandes douleurs, la douleur fait attraction des esprits, & des humeurs, les humeurs arriuant à la partie foible, en plus grande quantité qu'il ne faut, font vne inflammation, à laquelle suruiuent souuent vne fièvre, & en fin la mort. Nous auons veu aux guerrrs du Dauphiné, de Sauoye, & en Languedoc mesmes, vne secte de Chirurgiens qui pansent les blesez sans douleur. J'ay esté curieux de sçauoir

de quel artifice ils vsoient, j'ay trouué qu'ils n'ont point d'autre finesse que de ne mettre point de tentes. Cependant ils se glorifient d'estre inuenteurs de ceste nouvelle façon de pratiquer. & tout le monde sçait en ceste Cour qu'il y a plus de quinze ans que ie crie apres cela. I'adiousteray aux deux premieres raisons ceste troisieme, que ces grosses & dures tentes pressant l'artere qui doit battre librement, empeschent que l'esprit vital ne reuint pas bien à la partie, de sorte que la gangrene s'y met ordinairement. I'allegueray fut ce propos ce que j'ay veu, vn Gentil-homme de qualité auquel pour auoir voulu trop serrer vne veine & artere, qui estoient ouuertes, la gangrene se mit au bras

& mourut. Qu'un chacun donc soit aduisé aux bandages, & aux tentes. Je veux bien cependant aduertir les Chirurgiens, qu'il y a certaines playes, auxquelles les tentes sont necessaires, comme à celles de la poëtrine, j'entends s'il y a quelque partie interne blessée, pource que la matiere s'euacue plus aisément par l'ouuerture, que par la bouche, & mesmes nous sommes contraincts d'ouurir les Empyiques par le costé, pour en sortir le pus: de façon que ie condamne ceste nouvelle secte, qui tient qu'il ne faut iamais mettre de tente.

Cinquiesme Paradoxe.

LA plus grande partie des playes, se peut guerir par vn

simple remede qui est , ou l'eau
commune, ou l'huile.

Explication.

IE ne doute point qu'une in-
finité de Chirurgiens ne treu-
uent estrange ceste proposition,
& qu'ils ne me reprochent ce
que iadis on reprochoit à ceux
qui vouloient guerir toutes les
maladies par vn collyre : mais
l'experience que i'en ay faicte,
& la verité qui a plus de force
que tout , me contraignent de
sousttenir ce Paradoxe. Je dis donc
que les playes se peuuent gue-
rir par vn simple remede qui est
ou l'eau, ou l'huile. Quant à l'eau
toute pure, & nullement mix-
tionnee, iel'ay il y a quinze ou

seize ans, assez prouué en vn petit discours qui est imprimé sous mon nom, auquel a voulu contredire vn Chirurgien de Vendosme nommé Dionise, lequel pour toute raison n'allegue sinon qu'il ne l'a iamais ouy dire ny veu practiquer, comme si nous estions si miserables qu'il ne nous fust pas permis d'inventer quelque chose de nouveau. Nous sommes, dit le bon Guidon, sur le col du Geant, c'est à dire nous voyons ce que nos peres ont veu, & voyons par dessus eux quelque chose, mais il y a certaines personnes qui ont la ceruelle teincte en escarlate, & quand ils ont vne fois chauffé quelque opinion, il est malaisé de la leur oster. Ils met-

tent tousiours en auant la coustume, & moy ie croy que c'est vne espece de tyrannie, d'alleguer seulement la coustume, si elle n'est appuyee de quelque raison. Je dis donc encore vne fois, que i'ay traité plusieurs playes avec l'eau feule, & estant aux armées, depourueu de tout autre remede, & en ay veu des succez tres-heureux. D'en dire toutes les raisons, ie n'y suis pas tenu : car combien voyons-nous d'effets desquels la cause est incognuë aux plus grands personnages, & à ceux qui ont employé tout leur aage, à l'estude de Philosophie ? Mais ie pense qu'un des principaux moyens pour haster la guetison des playes, est de la rendre bien nette : or est-il que l'eau la nettoye, & deterge bien fort.

L'eau par sa froideur empesche l'inflammation, tempere l'ardeur des humeurs, les repousse ailleurs, & sert d'un percussif : joint que l'eau est un corps charnu, reünit la chaleur, laquelle estant le principal instrument de l'ame, & de la nature, haste la suppuration, si elle se doit faire, fait la regeneration de la chair, & en somme, s'il y a quelque chose d'estrange ou d'ennemy, le chasse. Quant à l'huile commune, ie croy qu'elle sert, pource que c'est vne espeece de baulme, qui a de l'amitié à la nature, & ie tiés que tous remedes qui peuuent conseruer la temperature de la partie, & fortifier la nature, font des effects admirables, & contraires. Combien voyons nous d'emplastres, d'onguens,

d'eaux qui seruent à des maladies contraires , qui arrestent le sang , & qui prouoquent , qui attirent & repoussent , qui eschauffent & refroidissent ? N'est-ce pas pource qu'ils ont vne temperature semblable à la nostre , & vne affinité à la nature , de sorte qu'elle se rend en fin maîtresse , & encore qu'elle ne soit apprinse de personne , fait toutesfois les choses comme si elle estoit sçauante , & guidée par la raison. Il y a en Languedoc, Dauphiné, & Prouence , vne secte de Chirurgiens , comme j'ay desjà dit , qui guerit toute sorte de playes , avec l'huile seule , & la fucille de chou. Je ne m'oppose point à leur pratique , veü qu'on en voit de beaux effets. Mais ic

les blasme d'une trop grande licence & presumption, pource qu'ils veulent permettre au malade toute sorte de viande, ne luy ostent point le vin, & se moquent des saignées & purgations. Je crois qu'ils font cela pour estre mieux suivis, car les malades naturellement suivent plustost ce qui leur agree & qui paroist estre plus doux.

Sixiesme Paradoxe.

IL n'est nullement necessaire de sonder si souvent les playes, comme l'on fait.

Explication.

C'Est vne coustume en pratiquant, de sonder cent fois

vne playe ; & s'il y a dix Chirurgiens appelez pour la panser, chacun a son tour ; apres auoir gratieusement baisé la sonde, la donnera à son compagnon. Je dis premierement qu'aux playes où tu vois l'entree & la sortie ; il ne te sert de rien d'y fouiller avec ta sonde ; car si tu es veü en l'Anatomie ; tu dois sçauoir quelles parties sont logees dans l'enclos de ta playe, que si la playe ne traaverse, tu te dois contenter d'auoir bien recognu le fonds sans y retourner si souvent, attendu que par les fondemens que i'ay ietté cy dessus, il n'est point necessaire de mettre tousiours des tentes. L'excepte seulement quand il y a quelque chose d'estrange qu'il faut tirer.

Septiesme Paradoxe.

C'Est vne erreur au coupe-
ment des bras & iambes, de
r'approcher le cuir & le coudre,
& de ne vouloir se seruir du cau-
tere.

Explication.

Ignorance pleine de cruauté, de
r'approcher le cuir d'un membre
coupé, par le moyen d'une gros-
se esguille, & faire quatre grands
points avec un gros fil bien redou-
blé. Et quoy, t'estonnes-tu si le
malade sent des douleurs insup-
portables, tu as scié ton os qui est
rude & inégal, tu appuyes la peau
qui est une partie sensible sur l'os, &

fais attrition par ce moyen de toutes ces parties. l'ay veu souuent faire ceste pratique, & l'ay y permis à mon grand regret, pour n'estre tenu de mes compagnons homme bigearre, & peu sociable; mais vn iour ie fus contraint de crier, on auoit couppe la iambe à vn capitaine, & auoit on ramené la peau de ceste façon. Ce pauvre homme crioit sans cesse, & sentoit de grandes douleurs, on luy appliquoit des cataplasmes anodins, mais tout cela pour neant. En fin l'impatience me print, & comme on le vouloit penser, ie iette tous ces cataplasmes, & coupe les points d'esguille qu'on auoit fait: en mesme temps la douleur s'apaisa, & ne sentit plus ces violences. Quant au cauterre, ie dy qu'a-

pres auoir couppé vn bras ou vne
iâbe & lié l'os, il est necessaire de le
cauteriser tu égales l'os, tu fais l'ex-
foliation, & entretiens la chaleur
naturelle de la partie. Au contrai-
re si tu laisses quelque inégalité
en l'os, la regeneration de la chair,
& la cicatrisation ne s'y feront ia-
mais si bien. Je te donneray vn
exemple familier pour te faire cõ-
prendre cela. Ceux qui se meslent
d'anter ou de greffer, apres auoir
lié l'ante avec vn liot qu'ils appel-
lent, prennent vn ferrement bien
tranchant, & avec icelui polissent
ce qui a esté lié, de peur qu'il ne
demeure aucune inégalité, car s'il
demeure en l'ante quelque inega-
lité, ne t'attends pas qu'elle puisse
iamaïs prendre: ainsi en pourrons
nous dire des os.

Huictiesme Paradoxe.

Les bras & les iambes doiuent
estre coupez bien pres des
iointures.

Explication.

L'Opinion commune est de
coupper les membres loin
des iointures, pource que les pla-
yes des iointures sont le plus sou-
uent mortelles. Mais ceste raison
me semble bien foible, d'autant
qu'en couppant les ligamens, les
nerfs, les tendons qui s'inserent
ordinairement pres des iointures
pour les mouuoir, ie ne fais point
de playes, ie les coupe du tout,
& oste la continuation qu'ils ont

avec leur principe, de sorte qu'il ne faut point craindre la conuulsion. Galien escrit en plusieurs endroits que si vn nerf ou tendon n'est qu'à moitié coupé, qu'il le faut couper du tout, & que c'est le seul moyen d'empescher les accidens. Pourquoy donc craindras-tu de couper la iambe, ou le bras pres de la ioincture, puis qu'en coupant du tout les tendons, les nerfs, les ligamens, tu euites le danger des conuulsions?

Neufiesme Paradoxe.

LEs bras & les iambes ne doivent estre coupees le iour mesme de la blesseure, si ce n'est qu'elles ne tinssent à rien.

Explication.

IE n'approuue point ceste pratique de vouloir couper vn membre, le mesme iour de la blessure, pource que i'en ay veu arriuer de grands inconueniens, & la raison y est toute euidente. Le malade est fort estonné du coup, son imagination fort troublee, les esprits tous esmeus, de sorte qu'il ne peut porter vne si grande operation. I'ayme mieux les laisser reposer vn iour, les preparer avec des remedes cardiaques & les laisser asseurer. Tu me diras que la gangrene s'y pourra mettre. Mais iet'estimeray bien pauvre Chirurgien, si tu ne la sçais empescher pour vn iour. Pour moy ie n'en vis

iamais arriuer le premier iour qu'une fois à un braue & honnesté Gentil-homme qui estoit au Roy, nommé Monsieur Dalen. Il auoit esté autrefois blessé d'une harquebuzade à la cuisse, qui luy auoit emporté une partie des vaisseaux, il en guerit, mais la partie deuint maigre, & comme en atrophie. Quelques années apres estant à la Haye, il fust blessé en la mesme partie, d'un coup qui luy emporta le reste des vaisseaux, c'est à dire des veines & arteres, de sorte que le mesme iour la gangrene s'y mist, pource que les esprits qui donnent la vie, & conseruent la chaleur naturelle de la partie, n'y pouuoient estre conduits, leurs canaux ayant esté coupeez & brisez.

Dixiesme Paradoxe.

POur la guerison de la verole,
il n'est pas bon de tenir les
malades si enfermez.

Explication.

EN la guerison de la verole ils
se commettent vn million
d'erreurs ; que ie ne veux pas à
present descouurir. Je remets
tout cela à vn plus ample & plus
particulier discours que i'en ay
fait, où ie monstre & enseigne le
moyen de bien suer & commo-
dement, le moyen de baner, cest
à dire de prouoquer le flux de
bouche, sans vser de l'argent vis,
& tout plein d'autres iolies in-

entions. Je me contenteray icy de dire que ceux qui frottent & font suer les verolez, ont grand tort de les mettre dans des cachots, où durant quinze iours ils ne laissent aucun air nouveau. Et quoy ne voyent-ils pas que les sueurs & vapeurs pourries qui sortent du malade, infectent l'air, & que le malade venant à respirer ce mesme air infecte de nouveau son poulmon, & par consequent les esprits naturels, vitaux & animaux qui s'engendrent de l'air respiré? L'ay accoustumé de purifier bien la chambre, d'y faire entrer vn air nouveau en ouurant les fenestres, & de peur que le malade ne sente ceste si soudaine alteration, ie l'enferme seulement dans son liét, & peu à peu l'accoutu-

me à ce changement.

Onzième Paradoxe.

QUand on a opiniõ que quel-
qu'un est infecté de la peste,
& que tous les signes y paroif-
sent, si la tumeur ne se presente,
on la doit & peut faire venir par
artifice.

Explication.

LA peste ayant son essence en
l'infection, & pourriture ma-
ligne des esprits & des humeurs,
n'a point de plus singulier reme-
de que celui qui chasse du de-
dans en dehors : & loin des par-
ties nobles ceste infection : C'est
pourquoy la nature se sentant at-

taquée de ce venin le chasse , & s'en descharge aux parties les plus viles , & plus foibles , qui sont les glandes appellees du vulgaire emunctoires , pource qu'elles seruent d'esgout , & de cloaque aux parties nobles. Le cerueau a son emunctoire , qui est derrière l'oreille. Le cœur l'a au dessous de l'aisselle. Le foye aux aines. Aussi voyons nous que la peste se manifeste à vn de ces trois endroits, par quelque tumeur que le peuple appelle bosse. Or s'il arriue que la nature se treuve empeschée , & qu'elle ne se descharge point en ses glandes , il ne faut point douter, que le venin demeurant au dedàs, ne se rende le maistre. Le Medecin donc qui la doit imiter , & qui doit estre son aide , doit attirer

ces humeurs, & vapeurs infectées,
& à la peau, & aux emunctoires: à
la peau avec vésicatoires & ven-
touses, aux emunctoires avec des
cauterres, non point communs,
mais de ceux qui en peu de temps
font vne tumeur grosse comme
vn œuf, & ouurent en mesme
temps la tumeur: de sorte que ce
chemin estant tracé à la nature, el-
le s'esueille & se descharge par là.
I'ay l'inuention de ces cauterres, &
les ay fait voir à tout plein de mes
amis qui ne le vouloient croire. Je
t'en donneray la description avec
la methode que ie promets, de la
curation de la verole.

Douzième Paradoxe.

LEs vnguens qui sont propres pour consommer les carnositez qui s'engendrent dans le canal de l'urine, appelé *Uretra*, ne doivent estre portez par la bougie.

Explication.

PLusieurs me blasmeront de vouloir corriger ce qui est de la pratique ordinaire, & qui est approuvé par les plus sçavans. Mais ie veux qu'ils sçachent que Dieu m'a fait naistre François, c'est à dire franc & libre, & que ie m'appelle aussi de mon nom François. Je dy donc que de mettre

l'onguent au bout de la bougie, c'est faire bien peu d'effet : car il faut que ce bout passe tout le long de la verge avant qu'il vienne au lieu de la carnosité, de sorte qu'il engresse tout le chemin & s'en rend bien peu au lieu malade. Je te veux donner vne autre inuention, ayes vne siringue qui aye le bec vn peu long & courbe au bout, mets y par le bout l'onguent qui soit de consistance mediocre, & iette le tout doucement, tu le conduiras iusques au lieu de la carnosité, sans toucher aucune autre partie, & garde toy bien d'irriter & chatoüiller par trop ces parties, pource que la gangrene s'y met aysément.

Trezieme Paradoxe.

LA suppression d'urine vient souvent sans qu'il y aye aucun empeschement au canal, ny au col de la vessie, soit par carnosité, soit par pierre, & lors sucçant par le bout de la sonde l'urine, le malade guerira.

Explication.

IE n'entreprends pas icy d'apporter toutes les causes de la suppression d'urine, ie laisse ce discours aux Medecins. Je diray seulement, encôre que ie ne sois que Chirurgien, & que ie ne sçache point de Grec ny de Latin, que i'ay veu mourir vne infinité

de personnes d'une suppression d'urine, qui n'auoient ny pierre dans la vefcie, ny carnosité, ny rien qui bouchat le canal de l'urine. Que si en ce temps la i'eusse fceu vn remede que depuis i'ay practiqué heureusement, ie croy que i'en eusse fauué plusieurs. Ceste suppression vient bien souvent d'une foiblesse, ie ne fçay si ie la dois nommer paralyfie, ou relaxation des fibres transuersales de la vefcie, de sorte que ces fibres qui font dediees pour l'excretion, ne se retirant point comme elles doiuent, sont cause de ceste retention. Cela arriuant, la vefcie se remplit, & s'estend, l'urine remonte & regorge dās les veines, suffoque le malade. Le moyen de tirer l'urine dehors est de mettre vn argalié

galie dans la vefcie , & puis fuccer avec la bouche , incontinent l'yrine viendra & fortira toute iufques à vne goutte , par cest artifice qui eft de mon inuention , tu faueras le malade.

I'euffe adioufté vne infinité d'autres sentences & belles pratiques que i'ay veües , fi le temps & le lieu me l'euffent permis. Excuse donc Lecteur , la rigueur du temps , pource qu'il m'a fallu compofer cecy dans les montagnes , & vne infinité d'occupations qui me font furuenues : & efpere que ie te feray bien toft voir chose qui te contentera. I'auoy vn discours chez moy de la pleurefie que ie defiroy il y a long temps de te faire voir. Mais eftant eſloigné de ma maifon , & n'a-

yant pas la memoire assez heureuse pour me resouuenir de beaucoup de particularitez, ie le remettray à vne autre fois. Je diray seulement en passant, qu'en ceste espece de maladie, Dieu s'est voulu seruir de moy pour conseruer le plus grand & le plus genereux Roy que la terre porta iamais: C'est ce grand Henry de Bourbon que tout le monde admire pour les vertus & rares perfections que le Ciel luy a liberalement departi, que toute l'Europe craint & redoute pour sa valeur, accompagnée d'un heur extraordinaire, que i'attribue non point à la fortune, mais à sa prudence & vigilance: que toute la France chérit & ayme, comme estant son libérateur & conseruateur. Il luy ar-

riua l'annee quatre vingts & dix
à la Motte Freslon, qu'apres auoir
ptins beaucoup de fatigue pour
secourir vne place qu'on tenoit
assiegee, appelée la Ganache,
comme cela luy est ordinaire, il se
trouua saisi d'vne douleur de co-
sté avec fièvre continuë, difficul-
té grande de respirer, en somme
c'estoit vne vraye pleuresie. Le me
trouue pour lors seul aupres de
sa Maiesté (i'entens sans Mede-
cin & sans Apotiquaire.) Le voy
d'heure à autre augmenter le mal,
elle m'appelle & me dit, Martel
ie n'en puis plus, n'attendez point
les Medecins, ouurez moy le co-
sté que ie sens plein d'apostume,
outirez moy tout à cest'heure du
sang : i'obeïs promptement à ce
commandement, & sans atten-

dre autre aduis , comme il sem-
bloit estre necessaire pour la qua-
lité du malade , ie suiuy ce conseil
salutaire. Dieu assëura ma main
tremblante , ie saignay prompte-
ment sa Maïesté , & tiray la quan-
tité de sang que ie iugeois raison-
nable. Lors la respiration se ren-
dit plus libre , la pleuresie suppura
& icetta l'apostume par la bouche,
& au septiesme iour qui est le Prin-
ce & le Roy de tous les critiques,
arriua vne crise à ce grand Roy,
par vne sueur vniuerselle qui em-
porta la fièvre. De sorte qu'il m'ar-
riua quasi mesme fortune qu'à
Critobule Chirurgicalien tres renô-
mé. Philippe Roy de Macedoine
pere de ce grand Alexandre , ayant
esté blessé d'une fiesche pres de
l'œil, & le fer y estant demeuré, ap-

pella son Chirurgien Critobule, & luy commanda d'oster le fer. Le Chirurgien se trouuant seul craignoit de faire ceste operation : en fin pour soulager son Maistre, tira le fer dextrement, & rendit la santé à son Roy. Tous les Macedoniens le vindrent caresser, l'philippe luy fit des honneurs & le retint tousiours pres de sa personne. Pareille chose m'arriva en ceste maladie, ie traictay le Roy par son commandement, & apres la guerison ie fus chery & caressé de tous ses seruiteurs : sa Maiesté depuis m'a fait l'honneur de se seruir de moy en plusieurs occasions. Je prie à Dieu de tout mon cœur qu'il le vueille conseruer longuement pour le repos de cest Estat, qu'il luy augmente ses benedictions,

qu'il luy donne bien tost pour le comble de son bonheur, & pour le contentement de tout son peuple, vne belle & bonne lignee: & qu'il me fasse la grace de luy pouvoir continuer longuement mes-
tres-humble service.

F I N.





CONDVITE DU *faict de Chirurgie.*

Des Indications.



Omme i'estois en propos peu apres Noël dernier passé, de ne plus faire leçon publique de Chirurgie, iusques à quelque tēps, qui me sembleroit plus commode, afin de vaquer cependant à autres miennes estudes particulieres, cōme les esprits des personnes se recreent & desennuyent de la diuersité des occupations, & aussi qu'il

est raisonnable de laisser quelque-
fois les affaires d'autrui pour les
siennes: mes auditeurs, les compa-
gnons Chirurgiens estudians à
Touts, honnestes ieunes hom-
mes, pleins de desir d'apprendre,
me sont venus prier de ne les abā-
donner du tout, ains leur conti-
nuer la lecture encore pour cest
an. En quoy voyant leur affection
tant bonne, ay consenty, ce que ne
leur ay peu refuser honnestement.
Car nous ne devons pas estre tant
auaritieux de nostre profit, que la
raison n'emporte de nous, que de-
uions relaschet auenefois quel-
que chose de nos affaires, pour
estre attentifs au profit d'autrui,
s'il est ainsi que Dieu mesme le cō-
mande, & nous montre & ensei-
gne que nous ne sommes pas du
tout

tout nais pour nous mesmes. Et
pource leur ay promis de conti-
nuer de leur lire, non seulement
cest an, ains tousiours tât que l'op-
portunité & la commodité de ce
faire ne me sera ostee, ce que dau-
tant plus volontiers ie fay, que i'y
pren plaisir, non seulement pour-
ce que ie voy qu'ils ont bon cou-
rage, mais aussi pource qu'ils ont
vne certaine façon gentille entre
eux, & quasi comme vne petite
police, laquelle i'enten que les au-
tres compagnons Chirurgiens ob-
seruent és autres bonnes villes de
France, elisant vn d'entre eux pour
leur supérieur, qu'ils appellent Ab-
bé, auquel ils donnent vn lieute-
nant, faisans leurs conseillers d'au-
tres : constituans quelque autre
pour receueur & procureur de

leur communauté, establissans autres offices & certaines loix, pour regler les compagnons, les contraindre à l'estude, & entretenir en leurs deuoirs. Et de là estois sur la derniere lecture de cest huer, & sur le terme de me reposer, quand à la priere susdite ils ont adiousté ceste-cy, que ie fusse content reduire par escrit, avant que les laisser aller sur ma promesse, la maniere de demander & respondre de la cure des vlcères, comme i'ay accoustumé de les instruire, en leur lisant le traité de la mesme matiere, contenu és troisieme & quatrieme liures de la methode curatiue de Claude Galien : estimans par ce moyen que ie ferois vn grand auantage à eux & aux autres compagnons estudians, pour

sçauoir bien examiner ceux qui voudront à l'aduenir commencer de practiquer ladite cure des vlcères. Ce que i'ay trouué fort bon: aussi pource que ce traité est la meilleure partie de la Chirurgie: & veritablement ie l'ay reduit en forme de demandes & responses, ainsi qu'ils m'ont demandé: & ay introduit l'vn d'entre eux, comme celuy qui m'a semblé plus sçauant, & desia exercité en cest art, deuisant avec moy de ceste matiere: & le commencement de nostre deuis est tel. A. Nous auons bonne enuie, seigneur docteur, d'entendre encore vne fois de vous, par maniere de répétition, tout ce que vous nous auez monstré ces deux mois derniers passez, de la conduite de la cure des vlcères, en nous

lisant les troisieme & quatriesme liures que Cl. Galien a composez de la methode qu'il faut suivre à guarir les maladies : & voulons bien vous prier de nous faire tant de bien, si vous auez loisir, & il ne vous ennuye. D. Compagnon & amy, ya il chose, qui me donne plus de contentement, que de voir apprendre quelque bonne chose de moy ceux qui m'ont elen pour leur maistre, & mesmement en l'estat & exercice qui m'est commun avec eux? Or ay-ie quelque peu de loisir, encore en ce temps-cy, que les matinees me sont donnees pour vaquer aux estudes des lettres: & la visite ordinaire des malades ne m'a osté la commodité de ce faire à icelle heure: & encore excepté ladite visite, il n'y a

heure du iour, en laquelle ie ne
voulusse mettre mes plus grandes
occupations derriere ceste vostre
affection tant honnesté. A. Vous
ne trouuerez donc pas mauvais
que comme vous auez accoustu-
mé de nous interroger sur les le-
çons que nous auez faites; sembla-
blement à mon tour ie vous inter-
roge des mesmes choses, par ma-
niere d'essayer si i'auray bien rete-
nu ce que nous auez monstté, & si
i'ay esté bon disciple. D. Vrai-
ment ie le trouueray bon ainsi, &
me plaist fort bien. Car par ce mo-
yen ie cognoistray que n'aez rié
oublé de ce qu'aez appris, &
vous entendrez par ordre ce que
demandez. A. Vous nous auez
enseigné, comme Galien, apres
auoir és deux premiers liures de

la methode de guarir les maladies, declaré sommairement qu'elle doit proceder par indication, disputant brauement contre les Empiriques, & tous ceux qui guarissent à l'aduenture, incontinent est venu au troisieme à declarer particulièrement par quelles indications ladite methode doit estre conduite: auquel il dispute fort & ferme contre les medecins de la secte d'un nommé Thessalus, lesquels n'ont suiuy en la cure de toutes maladies, qu'une indication vniuerselle prinse de l'essence de la maladie: & pour les confuter, a priu au commencement l'exemple de la cure des vlceres, en laquelle selon leur diuersité a montré estre besoin de prendre plusieurs & diuerses indications. En

pource que de là vous auez commencé de nous faire leçon de Chirurgie, il m'a semblé que ie vous doy demander premiere-ment, qu'est-ce que Chirurgie, quelle partie elle est de médecine, puis venir à enquerir des indications, tant en general qu'en especial, de la cure des vlcères, suivant toutes les autres choses qui vont après par ordre, selon que nous auôs apprins de vous. Qu'est-ce doncque Chirurgie ? D. C'est vn art & habilité de guarir, ditte en Grec Therapeutique, acquise par science & vltage, laquelle guarit les bosses & enleueures outrenaturelles, les playes & vlcères, les froissures & brissemens des os, les dislocations & desiointures desdits os. Car en ces quatre gen-

res de maladie, & non outre, s'estend le fait du Chirurgien. A. Quantes parties sont de medecine? D. Cinq. A. Quelles? D. La premiere est nommee des Grecs *Physiologie*, laquelle explique les choses naturelles de l'homme, & les choses appartenantes à l'entretenement de la nature d'iceluy: la seconde est dite *Pathologie*, & *Ætiologie*, c'est à dire, qui traite les genres des maladies & les causes d'icelles: la troisieme est appelée *Semiologie*, laquelle par certains signes les fait cognoistre: la quatrieme s'appelle *Prognostique*, laquelle deuine les euene mens des maladies, & ce qu'on en peut esperer ou craindre: la cinquieme, & derniere se nomme *Therapeutique*, c'est à dire, cura-

tiue , laquelle enseigne les moyens de remedier aux maladies, & ce qu'il faut faire pour les guerir. En toutes ces parties doit s'exercer le Chirurgien , & les auoir deuant les yeux en la cure de chaque maladie. A. Combien y a-il de parties de la Therapeutique? D. Trois : Pharmacie , qui traite des medecines : Chirurgie , des operations manuelles : Diete , du regime. A. Comment se doit traiter la Therapeutique? D. Par methode. A. Qu'est-ce que vous appelez methode? D. C'est comme vne conduite & voye seure pour paruenir à quelque intention : & à la verité, c'est (dit Galien) tout ce qui est contraire à experience. A. Y a il plusieurs especes de methode , & qui sont elles? D. Au-

cunes sont propres à traiter les sciences, & sont departies en trois genres, sçauoir, quand on traite lesdites sciences par voye, ou de composition, dire en Grec Synthetique, en allant de simple à composé, ou de dissolution, appelée des Grecs Analytique, contraire à la precedente, ou de diuision & definition, que lon nomme Horistique en Grec: lesquels genres de methode Galien a compris en vn petit liure, quil a escrit de l'ordonnance & establisement de l'art de medecine. Les autres especes de methode appartiennent à toutes choses & affaires, qui sont au maniment des hommes: comme on pourroit dire la methode & conduite de bastir & approprier vn logis, la methode &

conduite du labourage , la methode & conduite du fait de marchandise, de la guerre ou d'autre chose.

A. Quelle est la methode Therapeutique & voyesure de guarir?

D. Celle qui conduit & guide par indications. A. Que vaut à dire

Indication, qu'est-ce? D. Les me-

decins vsent de ce mot; qui est

propre à eux, & hors de l'vsage

commun du vulgaire. Car il faut

conceder à chacun estat & me-

stier certaine façon de parler, qui

n'est pas commune aux autres. Les

fauconniers ont certain langage,

qui leur est propre: aussi ont les

mariniers, les laboureurs, les sou-

dats, les artisans, pareillement les

Philosophes & gens de lettres

parlent de leurs sciences en autres

termes que le commun peuple.

Ainsi nous appellons Indication en medecine, comme vne enseigne que le medecin se met deuant les yeux, pour aduiser quel remede il doit prendre pour guarir ou preseruer la personne : tout ainsi comme les enseignes des hostelleries monstrent qu'on y loge les hostes, ou qu'il y a du vin à vendre, & les boites ou bassins pendus aux boutiques des barbiers & chirurgiens donnent à entendre, que leans on fait la barbe, ou guarit les playes.

A. Comment guide par indications la methode de guarir ? D. En deux manieres, sçauoir, par le moyen de les trouuer, & par le moyen de s'en aider.

A. Qui est le moyen de les trouuer & s'adresser deuant les yeux ?

D. La science & industrie de bien
departir & diuiser. A. Suyuant
donc cest art de diuision, de quã-
tes especes d'indications s'aide le
medecin à trouuer les moyens de
guarir? D. On les peut diuiser &
separer en deux manieres: mais la
plus commune est de trois es-
peces, en diuisant chacune d'i-
celles en plusieurs particulieres.
La premiere est des choses natu-
relles: la seconde, des choses non
naturelles, c'est à dire, hors de
l'essence naturelle del'homme: la
tierce, est des choses contre natu-
re, iacoit que Galien reduise les
deux premiers en vne, au chap.
viij du troisieme liure de sa me-
thode. A. Que nous indiquent &
enseignent les choses naturelles?
D. Qu'elles doiuent estre conser-

nees par leur semblable : & de ce genre l'indication est appelée *Conseruative*, combié qu'elle serue à la cure. A. A quel scope & intention s'adressent les indications des choses non naturelles, c'est à dire, qui autrement sont naturelles, mais hors de la substance de l'homme ? D. Elles se rapportent quasi aux indications des choses naturelles d'iceluy, & nous indiquent presque mesme fin. A. Que nous est indiqué & signifié par les choses contre nature ? D. Quelles doiuent estre ostées ou prohibées par leur contraire. Et telles indications sont de deux genres. Car si elles sont prinſes des causes extérieures & primitives nō permanentes, pource qu'elles nous admōnestent de nous preseruer, sont dites

de Galien preseruatives, au chapitre troisieme du liure quatriesme de la methode. Combié que ledit docteur n'ose les appeller proprement indications. Mais si elles sôt prinſes de l'essence de la maladie, ou des causes interieures, tant antecedentes que coniointes d'icelle, ſont veritablement & proprement nommees curatives, A. Combien & qui ſont les especes des Indications prinſes des choses naturelles, que vous appelez conſervatives? D. Elles ſont pluſieurs. Les vnes regardent à la force & vertu de la perſonne : pour laquelle conſeruer bié ſouuēt faut laiſſer la cure principale. Les autres ont la veüe à la tēperature & cōplexiō naturelle du corps, de laquelle icelles prēnēt le nom, faiſant conſiderer ſi le corps

est chaud , ou froid , ou sec, ou humide simplement: ou s'il est chaud & humide tout ensēble , ou chaud & sec, ou froid & humide, ou froid & sec : dauantage s'il est cholérique, ou melancholique , ou flegmatique, ou sanguin. Aucunes appartiennent à son habitude , en regardant s'il est delicat , mince , de petite corpulence , ou robuste, charnu , & quarré. Aucunes sont propres de la nature & complexion de la partie où est le mal , de laquelle partie on tire plusieurs aduis & indications : comme de la substance , si elle est similaire ou organique (ces mots sont propres de l'art de medecine.) De la similaire on regarde si elle est chaude, froide, seiche, humide : ou chaude & seiche , chaude & humide, froide

froide & seiche, froide & humide, & si elle est molle comme la chair, dure comme l'os, moyenne comme le nerf. De l'organique, si elle est principale & noble, ou seruante & moins noble, ou non noble du tout. Rareillemēt on prend indication de son habitude, ou pour mieux dire comme Aristote, de la puissance ou impuissance naturelle, comme du sentiment agu & delicat, ou hebeté & lourd, ainsi que Galien escrit en sa methode au liure quatriesme, chapitre septiesme. Item de son essence & composition, c'est à sçauoir, de sa forme, figure, magnitude, nombre de ses parties, de sa colligancē, & semblablement de sa situation, finalement de son action & vsage. Car de toutes

ces choses se doiuent prendre indications en la cure du mal, qui aduiët en ladite partie, pour la conseruer en son naturel, luy ostant ce qui est contre naturel. On pourroit cōprendre en ce premier genre d'indicatiōs celle qui est prinse du sexe, pource que c'est vne chose presque naturelle. H. Combien sont, & quelles les indications des choses non naturelles, & qui sont hors de la substāce de la personne? D. Elles sont pareillement de plusieurs especes. Car les vnes sont dites de l'aage, qui est vne chose s'approchant aux naturelles: autres portent le nom des choses qui sont durtout hors la nature de l'hōme, c'est à sçauoir, de l'air, tant ce-luy de la natiuité & au païs, que ce-luy de la demeure & qui est habi-

tué de la personne : semblablement de la saison de l'année gardant sa température : aussi de l'éducation & accoustumance. Desquelles choses , ainsi comme si elles estoient naturelles , c'est à dire, de la substance naturelle du corps de la personne, l'intention & le but est de les conseruer, & ne dōner à la persōne chose à elles cōtraire. A. S'ensuit-il par cela que lescdites indications des choses susdites, tāt naturelles que presque naturelles, & celles qui sont hors de la nature & essence de l'hōme, ne tēdent à autre fin, siñō à conseruer icelles par leurs semblables ? D. Il ne s'ensuit pas , car elles sont aussi considerées & prinses en intention de sçauoir & aduiser ; si on peut vser de mesmes medicamens & mesmes

moyens de guarir vne mesme maladie en la diuersité & difference des choses susdites. Par ainsi dōcques elles sont aussi nommees curatiues. Car elles nous font entendre & distinguer la diuersité de la cure d'un mesme genre de maladie en diuers respects, & selon la difference des complexions des corps, des parties du corps, de l'aage, de l'accoustumance, de la saison & des autres choses susdites, desquelles elles sont indications & enseignes : & nous donnent à penser outre cela qu'il aduiuent aucunesfois que la maladie mesme, non seulement n'est guarissable en toutes complexions de personnes, en tout sexe, en toutes parties, en tous aages, en toutes saisons, en tous airs, en toutes cou-

stumes & façons de viure : mais aussi ou elle seroit guarissable , ne seroit par mesmes moyens. Car à la verité ils sont aucunes parties & aucunes personnes , aucuns airs, & aucunes saisons ou dispositions de temps , ou vne mesme maladie n'est guarissable , & és autres se peut guarir. A. Cela croy ie bien. Car i'ay souuent ouy dire que l'ulcere des poulmons, ou de la partie nerueuse du diaphragme , ou du dedans de la vescie , ne se peut guarir , ne le chancre vlcéré du polype qui est au nez , pour le regard de la partie , & n'y a pas remède à la gale Neapolitaine inueterée en vn homme melancholique , pour le regard de sa complexion : & vaut tant l'indication prise du regard de la region & d'un

pays, que plusieurs dient qu'une
faite en la teste au ferein de Naples
ou de Rome, mal aisément se gua-
rit. Que diray-je de l'aage, que
beaucoup de maladies ne se gua-
rissent és vieux, qui sont guarissa-
bles és ieunes gēs? D. Il est ainsi: &
le divin Hippocrates escrit assez
de choses sēblables, quād il dit au
liure sixiesme, Aphorisme sixies-
me, que la frenesie au dessous de
quarante ans ne se guarit point: &
au liure second, Aphorisme deu-
xiesme, les longues maladies de
vieillesse, & le mal des reins, & de
de la vescie, l'enrouëure, la toux, la
courte halene, & plusieurs autres
maladies de vieilles gēs, les accō-
pignent à la mort: & quant à l'en-
droit des parties, les chancres oc-
cultes ne se guarissent, sinō à grāde

peine, ou plustost nullement: quāt
à la saison, il est assez clair, que la
fieure quarte entracinee, ne se gua-
rit point en hyuer, & bien peu la
quotidiane: & ainsi on peut iuger
des autres indications. A. Mais
de celles qui sont guarissables, non
toutefois par mesmes moyens, ie
desireroys cela estre esclarcy, &
par les menus, & à la verité ie
l'entendray mieux, si ie vous in-
terroge en ceste maniere: Voicy
vn homme de complexion froide
& seiche & melancholique, atte-
nué, de petite corpulence, ac-
coustumé & nourry és estudes,
demourant és lieux solitaires, en
pays froid & mal sain, en mai-
son obscure & mal plaisante, vsant
de gros regime, lequel a la fieure
tierce en hyuer, ou vn vlcere

avec flegmon aux yeux , ou bien quelque autre maladie vniuerselle ou particuliere. Voicy vn autre homme d'autre aage, d'autre complexion naturelle , d'autre corpulence & habitude de corps , d'autre accoustumance , d'autre regime , d'autre demeure , ayant la mesme maladie , ou en tout le corps, ou en la mesme partie, mais en autre temps : ladite maladie est elle guarissable par mesmes moyens , en l'vn comme en l'autre ? D. Non. Car il y a grande difference en toutes indications , tant des choses naturelles que non naturelles. A. Or ne mettons pas tant de differences ensemble, n'en prenons qu'vne en chacun exemple , & posons le cas , que toutes les autres choses sont semblables

& s'accordent. Voicy vn homme & vne femme, qui ont vne mesme maladie vniuerselle ; comme la fièvre, ou vne autre particuliere: sera elle guarie en l'vn comme en l'autre ? D. Non : par ce qu'ils sont de diuerse temperature, à cause du sexe. A. En vn corps mol & delicat ou mince, & de rare texture, la maladie est elle guarissable par mesmes remedes, qu'en vn corps dur, robuste & charnu ? D. Non : car autant de difference d'habitudes de corps, autant de medecines differentes. A. Vne fièvre de mesme espece, ou vn ulcere, ou vn autre mal se guarit il en vn flegmatique, comme en vn cholérique, en vn corps sec, comme en vn de temperature humide ? D. Il n'est possible. Car telle

est l'indication prinse de la complexion de la personne, qu'autant qu'ils sont de cõplexions du corps differentes, autant de remedes differens. A. Parlons de la difference des parties. Deux hommes se trouuent de mesme complexiõ de corps, & qui se ressemblient au reste, ayans vn mesme genre de maladie en diuerses parties: est elle à guatir en l'vn comme en l'autre? D. Vous pouuez penser que non, quand elle seroit encore en vn mesme homme seul. Car autant de parties, autāt de remedes propres à icelles: & autāt que sont de choses à considerer, tant en partie similaire, que organique, autant sont d'indications d'icelles, & par consequent autant de medicamēs à elles conuenables. Car l'ylcere

des yeux ne se guarit comme celuy des oreilles: le flegmon en la gorge ne se guarit comme en vne autre partie: on ne fait repercuſſion d'iceluy au commencement aupres de la partie noble, comme au loin d'elle. la ſolution de continuité ne se guarit en partie nerveuſe, comme en partie charnuë, en partie ſeiche, comme en partie humide. A. Que dirons nous de l'indication de la ſaiſon? Il ſe trouue vne meſme maladie en meſmes parties, ou en meſmes complexions de perſonnes, mais en diuerſes ſaiſons, ou en diuers temps, ſe guarira elle en vne meſme façon & par meſmes medemens? D. Il ne ſe peut faire. Car chacune ſaiſon ou diſpoſition du temps requiert ſon medica-

ment différent à l'autre. La médecine ne se donne és iours caniculaires telle comme en hyuer. Les medecines fortes se donnent en esté par le bas plustost que par le haut. La dicte ne se fait en hyuer comme au printemps. Le flegme ne se guarit en esté comme en hyuer, ne la fièvre tierce en hyuer comme en esté. A. Il faut donc ainsi dire de l'air naturel ou autre. Si quelqu'un se trouue malade en vn autre air, que de son pays ou de sa demeure ordinaire, ne se pourra guarir par mesmes moyens, prenant indication de la difference des airs. D. Il est vray. Car autant d'airs, autant de moyes de guarir. A. L'indication de l'estat, coustume & façon de viure ne porte elle aussi beaucoup de

différences de l'usage des remèdes ? D. Pourquoi non ? Jamais ie ne diray qu'une mesme maladie sera médicamentee d'une façon, en un homme de longue robe, comme en un de robe courte : en un homme de ville, comme en un homme des champs, ou un charrier, ou un marinier, ou un soldat : en un qui a accoustumé le froid, comme en celui qui a accoustumé le chaud : en un qui a toujours beu du vin, comme en celui qui n'en beut iamais, encore qu'ils fussent de mesme aage, & eussent mesmes maladies en un mesme temps, ne differens de rien en autres choses. A. Que faut-il dire de ceux qui different d'aage, & ont une mesme maladie ? Un ieune enfant de mesme ville (pose

le cas encore qu'il soit semblable de toutes choses , tant naturelles que non naturelles , à vn homme qui sera d'autre aage , iagoit que toutes ces semblances ne peuvent estre) toute fois par maniere d'exemple aura semblable maladie, voire en vne mesme partie du corps : sera elle guarie par mesmes medicamens en l'vn , comme en l'autre ? D. Il n'est possible : parce qu'il est besoin d'autant de medicamens que d'indications , & chacun aage porte la sienne. Et toute fois peut aduenir vne chose, qui semblera estrange , & qui est fort subtile , que pour raison de la difference de l'aage , les complexions contraires tant du corps que de la partie malade , se rapporteront quasi à vne complexion sem-

blable, & s'accorderont à vn mesme moyen de guarir. Comme voicy vn homme vieil, chaud & humide du corps, qui a vn vlcere caue, en vne partie de mesme cōplexion : & voicy tout au cōtraire, vn enfant de qui le corps est froid & sec, ayant en partie de mesme complexion, vn tel mal que l'autre : vous me demanderez, faudra il appliquer mesme medicament à tous deux ? A quoy ie respondray possible estre que ouy. Attendu que la chaleur & humidité de l'vn, pour le regard de sa vieillesse, ne seront en rien differentes des qualitez de l'autre, à cause de sa jeunesse, estant croyable que les qualitez du ieune homme ne seront trouuees tant froi-

des & seiches , qu'elles ne soient
autant chaudes & humides , que
celles du vieil homme , qui est de
côplexion chaude & humide. A.
Or reuenons au tiers genre des in-
dications , que vous auez propo-
sé cy deuant , qui est de celles que
vous auez nommées curatiues, les
quelles sont prinſes des choses cõ-
tre nature : combien ſont elles , &
qui ? D. Les vnes ſont produites
de l'eſſence de la maladie , ſoit
qu'elle eſt homogenee & ſimple ;
ſoit qu'elle eſt heterogenee &
composee : les autres ſont tirees
des cauſes d'icelle , tant antece-
dentes que coniointes : les autres
des ſymptomes & accidens , qui
accompagnent ladite maladie.
Toutes lesquelles indicatiõs nous
ſignifient l'intention de la cure de-

voir estre accomplie par vsurpation de choses , à la maladie , aux causes & accidens d'icelle opposites & contraires. A. Or vous avez exposé l'vne des manieres de diuiser les indications , laquelle vous avez dit estre la plus commune & la plus vsitée des medecins : i'atten maintenant , que vous exposez la seconde. D. La vraye & plus gentille diuision des indications qui soit, ie pense que ie suis le premier des medecins , qui l'ay reduite en la forme de la diuision des argumens , selon Aristote & Marc Tulle: laquelle i'ay suiue en vn traité que i'ay composé & intitulé *Topicorum seu de inuentione remedii*: & vient à point maintenant de l'approprier au present propos des indications

curatiues des vlceres. Car il y a grand'approche des argumens aux indications. Or tout ainsi comme les susdits. Philosophes diuisent les argumens , & les distribuent par certains lieux , en tirant les vns du dedans de la chose dont est question , lesquels ils appellent en Grec *Emphyta* , en Latin *Insita* , c'est à dire , inferez & entez en la substance de ladite chose : les autres de dehors , que les Grecs appellent *Ta exothen* , ou *Exoterica* , Cicero les nomme *Assumpta & ducta extrinsecus* , c'est à dire , qui sont hors de l'essence de la chose proposee : en semblable maniere ie diuise les indications , qui sont comme argumens & raisons de la cure d'une maladie , en prenant aucunes

d'icelles du dedans de la chose
mesme, c'est à dire, de l'essence de
la maladie, & les autres de de-
hors de ladite maladie. A. Qui
sont celles de dedans ? D. Elles
sont de deux especes. La premie-
re est propre du nom & de la de-
finition de la maladie : laquelle
espece est generale & commune
de toute la cure de ladite maladie :
la seconde des differences & acci-
dēs tāt inseparables que separables
d'icelle, laquelle espece est propre
& particuliere de ladite cure. Cel-
les de la premiere espece sont uni-
uerselles, & ne limitent point, ny
enseignent le moyen ne la possi-
bilité, si aucune y a, de paruenir
à l'intention de la cure : comme
quand ie propose, que la maladie
est vn ylcere, sans adiouster les.

différences d'iceluy, la vraye & propre intention, qui est signifiée par ladite vniuerselle & premiere indication d'iceluy vlcere, c'est qu'il le faut desseicher & vnr par médicament desiccatif & glutinatif: mais ladite indication ne limite point le moyen ne la possibilité, comment par ledit médicament on paruienne à ceste intention. Celles qui sont de la seconde espece, & que i'ay dit estre particulieres, limitent & specifient, non seulement ladite maladie, mais aussi le médicament propre pour la guarir, presupposant qu'elle soit guarissable: comme font les indications prises de la longueur, largeur, profondeur de l'vlcere, de sa figure, de sa situation droite ou oblique, haute ou basse, de son

égalité ou inégalité, de son apparence ou couverture, & de certaines autres propres différences dudit vlcere, & comme font aussi les indications qui sont prises des causes antécédentes ou coniointes d'une maladie ou des symptomes d'icelle : & entre autres, celles desquels Hippocrates, ainsi que Galien dit, est le premier inventeur : lesquelles sont prises de la grandeur & vehemence de la maladie. A. Qui sont les indications que vous appelez de dehors ? D. Elles sont de plusieurs especes. Car ie les diuise premierement, en la forme que les Rhetoriciens departent les raisons de loüange ou de blasme, en deux genres : l'un desquels ils prennent des lieux des personnes, l'autre des lieux

des choses qui sont hors des personnes. Les indications prises des lieux, & des personnes, sont celles que nous auons dites cy deuant des choses naturelles & presque naturelles, comme de la complexion du corps, de sa force & habitude naturelle, du sexe, de l'aage, de l'educatiõ & coustume, & aussi de la complexion de la partie, de sa composition, c'est à dire, de la substance, forme, figure, magnitude, nombre de ses parcelles, de sa situation & colligance, de son sentiment agu & delicat, ou hebeté & grossier, de son action & vtilité. Celles qui sont amenees des lieux de dehors de la personne, sont les autres circonstances, qui ont esté appellees indications des choses neutres, qui ne sont natu-

relies ne contrenaturelles , c'est à dire , qui ne sont , ne de la substance de la personne , ne de la maladie , comme le temps , la saison de l'an , l'air de la region & de-mourance , & l'air qui environne le malade , gardant chacune d'icelles choses sa temperature. Or toutes les indications susdites de dehors , ainsi comme nous auons dit de la seconde espece de celles de dedans , qui sont prinſes des propres differences de la maladie , sont dites lors particulieres , quand elles sont adiointes à ladite maladie , comme circonstances d'icelle : lesquelles tout ainsi qu'elles ſpecificient , limitent , determinent icelle , & la rendent particuliere , auſſi determinent , particulariſent , modifient le medica-

ment, qui autrement estoit indeterminate & commun à ladite maladie. Et pource, toutainfi que les Grecs appellent these, vne proposition vniuerselle indeterminee, nō restraite ne limitee d'aucune circonstance : & au contraire nomment hypothese, ladite proposition, quand elle suppose quelque circonstance, de laquelle est limitee, comme certaine personne, certain temps, certain lieu ou autre chose: aussi ie puis nōmer la maladie comme vne these, laquelle n'est determinee ne limitee d'aucune circonstance, ains est cōsideree generalement & vniuersellement : & l'indication prise d'elle, ie la puis appeller thetique, c'est à dire, positive & absolue, c'est à dire, sans aucun regard de chose

chose speciale, laquelle pour ceste cause n'enseigne point la possibilité ou impossibilité de remedier à ladite maladie, & ne determine point le medicamēt propre à icelle. Au contraire j'appelle ladite maladie, comme hypothese, quād il y a supposition d'aucune des circonstances & differences susdites, de laquelle est limitee & faite particuliere : & les indications propres de la cure d'icelle, ie les nomme hypothetiques & suppositives, & lesquelles estans prinies desdites circonstances & differences, specifient, determinent & modifient le medicament, qui luy est convenable, & declarent la possibilité ou impossibilité de la guair. Parquoy, pour faire brief, ie distinguera y ainsi les noms de tou-

tes les indications susdites: Celles qui sont prinſes du dedans de la pure eſſence de la maladie, & non des differences, cauſes ou ſymptomes & accidens d'elle, veritablement lon peut appeller Indications premieres, mais non pas principales de la cure de la maladie, Indications communes, indications generales, ou Indications de la cure vniuerſelles, Indications indefinies, & ſans regard d'aucune difference ou circonſtance ou circonſtance, Indications thetiques, c'eſt à dire, poſitiues, Indications qui enſeignent vniuerſellement & generalement la cure de la maladie, ne limitans point ne ſpeciſiâs le remede, c'eſt à dire, ne declarans point la maniere ſ'il eſt poſſible

ou impossible de remédier à icelle. A l'opposite celles de dedans, qui causes ou symptomes de la maladie, & toutes celles qui sont de dehors, sont appelees Indications secondes, & neantmoins principales de la cure de la maladie, Indications propres, Indications particulieres, Indications speciales, indications hypothetiques, c'est à dire, de la cure d'une maladie, en laquelle on suppose aucunes circonstances & certes choses adiointes à icelle. Lesquelles indications demonstrent en particulier, limitent, specifient, modifient & approprient le medicament & remede, qui estoit autrement vagabond & general, de ladite maladie, non cō-

uenable ny à chacune difference d'icelle, ny à chacun. Et pour dire plus clairemēt & sommairement, font indications de possibilité ou impossibilité, c'est à dire, de la maniere comment il est possible ou non, d'accomplir l'intention de l'indication premiere. A. Vous avez deduit à mō gré bien claiement, en l'vne & l'autre maniere, les diuisions & denombrements de toutes les indications & enseignes medicinales, qui font trouuer les moyens de guarir & conseruer les personnes: chose à la verité que ie n'ay iamais ouy dire auoir esté traitee en telle sorte, par ceux qui ont escrit de l'art de medecine. Mais quelqu'vn pourroit trouuer estrange qu'il soit besoin rechercher tant d'indications à guarir

vne maladie, voyant que plusieurs qui ont bruit d'estre medecins, n'en vsent que d'une, sçauoir de celle qu'ils prennent de l'essence de la maladie : de laquelle indication le but & intention est de guarir ladite maladie par son contraire, comme la raison veut, & est la sentence commune de Hippocrates & de Galien & de tous les medecins, que toute maladie par son contraire est guarie. Pour ce regard & selon cest aduis & autorité, il s'ensuiuroit que ceste indication seule amence de l'essence de la maladie, seroit suffisante pour trouuer le moyen de guarir ladite maladie, & n'en faudroit point d'autres. D. La consequence ne seroit pas bonne. Car vous accordant ce que dient tant

de grands personnages, & ne niant point qu'il ne soit raisonnable de guarir la maladie par son contraire, non pourtant ne faut pas inferer, que l'indication prinse de l'essence de ladite maladie soit suffisante : laquelle admise & receüe pour necessaire, ne tollit pas la necessité des autres. On la tient bien pour la premiere, comme j'ay deuant dit, mais non pas pour la principale. Car comme dit Galien elle ne indique pas le moyen, s'il est possible de guarir la maladie ou non, cōme font les autres, lesquelles pour ceste cause sont principales & necessaires. Et tout ainsi que les philosophes pour conclure leurs themes & questions, vsent de plusieurs demonstrations & argumens necessairement croyez.

bles, & les orateurs de toutes sortes de preuues, pour venir à la consequence de leur propos, & faire la closture de leur harangue & oraison: aussi les Medecins pour venir à l'intention de la cure de quelque maladie, vsurpent toutes sortes d'indications. Et pourtant ne faut s'arrester à l'exemple des Medecins vulgaires, & qui se vantent d'estre methodiques, comme faisoient les Thesaliens: lesquels errent grandement, & tirent le patient en danger, ne suiuanz en la cure d'une maladie, sinon ceste seule indication, prinse de l'essence de ladite maladie, abusez de faute d'entendre la sentence commune susdite, que le contraire est guarý par le contraire. Car ceste senten-

ce comprend aussi estre de besoin
de suiure autres indications , les-
quelles enseignent plusieurs mo-
yens pour venir à l'effect de ceste
„ guarison. La premiere indica-
„ tion (dit Galien au commence-
„ ment du troisieme & quatries-
„ me de sa methode) n'est pas vne
„ grande partie de la medecine
„ curatiue , ains le commence-
„ ment seulement & le fonde-
„ ment d'icelle : ne aussi n'est pas
„ chose propre du medecin, estant
„ commune aux simples gens, voi-
„ re à vn enfant. Car en ceste in-
„ dication n'y a aucun artifice , ny
„ autre chose ingenieuse , qui ne
„ soit toute commune & manifeste
„ à tout chacun. Car les simples
„ gens mechaniques & ignorans,
„ s'ils sentent quelque membre
hors

„hors de son lieu naturel, diront
„bien qu'il le faut reduire & re-
„mettre en sa place naturelle: di-
„rôt bien aussi que l'ylcere se doit
„figiller: que le flux de ventre se
„doit restraindre: mais ne sçau-
„roient dire les raisons & mo-
„yens, par lesquels on doit ces
„choses accomplir & mettre à
„execution. Et c'est cela qui se
„doit adiouster du medecin, vray
„curateur de maladie, lequel
„pourra seul inuenter les choses,
„par lesquelles sera mis à effect
„ce qui nous est insinué & donné
„à entendre par la premiere in-
„dication. Et toutes ces raisons &
„moyens, qu'il faut inuenter pour
„venir à cest effect, ou pour co-
„gnoistre si le mal est possible de
„guarir ou non, nous les trou-

uons par les indications particulières susdites, tant des choses naturelles & non naturelles, que contre nature, lesquelles restringent & limitent ladite première indication estans adiointes avec elle. A. Ores ie cognoy facilement par le discours desdites indications, ce que vous auez dit dès le commencement, que par elles se guide la methode de guarir, & que la guarison & cure des maladies est du fait de la raison, & non de l'expérience. D. Il est vray. Car, comme i'ay tantost dit, iaçoit que les empiriques & le menu peuple diront bien, que toute solution de continuité requiert vnion, & qu'à toute maladie son contraire est nécessaire: toutesfois c'est le fait du seul homme sçauant de co-

gnoistre ; si ladite vnion à toute
solution de continuité est pos-
sible , & si elle se peut accom-
plir en toutes les parties du
corps, ou si en aucunes non. Car,
ainsi que dit Galien, le commun
& simple populaire est igno-
rant, que la nerueuse partie du
diaphragme (c'est comme vne
closture trauersant entre le ven-
tre & le corselet) estant blessée,
ne se peut consolider : & ne sçait
que les intestins grẽsles, s'ils
sont naurez, sont incapables de
la fin, qui est par leur indica-
tion signifiée, c'est à dire, de l'y-
nion : & que le prepuce ne peut
estre reünny, s'il est vne fois di-
uisé & coupé: aussi ne porroit il
dire, si putrefaction en vn os est
curable, ainsi que erosion en la

„ chair : si fracture se peut repren-
„ dre & reünir, comme playe, ou
„ si ladite fracture se peut gluer
„ & conioindre par substance cal-
„ leuse. Dauantage il n'entend
„ point, si és fractures de la teste
„ l'on doit attendre generation
„ du cal, ou si elles se doient cu-
„ rer en autre maniere : encore
„ entend il moins, s'il y a esperan-
„ ce de recouurer santé, quand le
„ coeur est nauré, ou le poulmon,
„ ou l'estomach, ou le foye. Et
„ pour dire sommairement, ledit
„ simple & commun peuple n'en-
„ tend rien outre la premiere indi-
„ cation : & tous les Empiriques
„ n'en sçauent pas beaucoup da-
„ uantage, quoy qu'ils facent grãd
„ cas de leur experience, laquelle
„ encore qu'elle soit l'un des deux

„instrumens de toute inuention,
„toutefois elle ne peut, comme la
„raison (qui est l'autre instrument
„d'inuention) trouuer ny ensei-
„gner la substance de la partie où
„est le mal, ne son action, ne son
„vsage ou vtilité, ne la situation
„ou colligance, ne les autres chō-
„ses dont on prend indications
„particulieres : moyennant les-
„quelles, tout medecin rational
„& methodique pourra preuoir,
„non seulement les maladies in-
„curables, mais aussi celles qui se
„peuent guarir, & les remedes
„avec lesquels elles seront gua-
ries. A. Par cela vous ostez bien
le moyen aux Empiriques & ad-
uentureux de se glorifier de leurs
belles pratiques, & se vanter d'e-
stre autant sçauans & experts, que

les Medecins methodiques & assurez, estans les indications & la raison, le moyen seul qui les separe, & met la difference entre eux. Or iusques à present vous auez bien au long expose le moyen comme l'on trouue lesdites indications, ayant declare premierement qu'est ce qu'Indication: de quantes especes d'icelles doit vser le medecin de bonne conduite, à guarir les maladies: laquelle est la premiere & generale: qui sont les secondes & speciales, & qui sont les principales. Il seroit temps maintenant de sçauoir, ce que vous auez ensemble propose au commencement de dire le moyen, comment, l'on puisse vser & s'aider desdites indications. D. Ce dernier

moyen est departy en deux. Le premier se traite en general par certaines regles de chacune indication consideree par soy sans conference , & en special par exemple en chacun genre de maladie : comme par les exemples des vlceres nous pourrons declarer cy apres , quand nous parlerons des indications curatiues desdits vlceres. Le second est de la conference & parangon desdites indications concurrentes en vne maladie. A. Laissons donc pour le present le premier moyen d'vser des indications , iusques en autre lieu, où nous traiterons à loisir les regles des indications considerees simplement & par soy : & venons au propos de demander du parangon d'icelles,

aduenant qu'elles se rencontra-
sent differentes & contraires en
vne maladie simple & seule, ou
composee & accompagnee, que
faudroit il faire à cela ? D. Il sem-
ble que Galien donne dequoy res-
pondre à ceste demande, au cha-
pitre IX. du troisieme liure de sa
methode: auquel lieu il dit, qu'il
aduient souuent, que les contrai-
res indications sont faites en vn
mesme temps: & aussi tout ce qui
est insinué par elles, est mis à exe-
cution en vn mesme temps: vou-
lant donner à entendre des indi-
cations contraires, prises des
choses naturelles & non naturel-
les, & de la maladie. Puis dit bien-
tost apres, qu'il aduient aussi au-
cunefois, que ce qui est insinué par
les indications diuerses, ne peut

estre accompli en vn temps: voulant (ce cuide ie) signifier les indications prinſes des maladies complicees enſemble : lesquelles requierent estre curees par ordre les vnes apres les autres, ſi non que aucune reſtaſt ſans pouoir estre guarie. Et par ainſi à ce que m'auetz demandé , ie reſpondray comme à deux demandes: l'vne de la conference des indications contraires des choſes contre nature : l'autre du paragon des indications des choſes , tant naturelles & non naturelles , que contrenaturelles. Quant à la premiere, ie diſtingueray ainſi : ou il y a autre maladie complicee, vrgente & perilleuſe , ou non. S'il y a maladie complicee , vrgente & perilleuſe , elle nous indique &

enseigne estre de besoin de commencer la cure par elle mesme, nonobstant que par ce moyen il en restast vne incurable, ou qu'on fust contraint d'en faire vne autre qui demeureroit sans estre guatie. Car le mal qui est vrgent & perilleux, est aucune fois de telle sorte, que pour le guarir il faut laisser vn autre mal incurable : & aucune fois est necessité que nous engendrions nous mesmes le dit mal sans pouuoir le guarir. Comme si la tette du muscle estoit piquee, & qu'il suruint conuulsion, à laquelle ne fust possible suruenir par medicamens : lors en incisant de trauers tout le muscle, nous guarirons la conuulsion : mais aussi nous priuerons la partie où est le muscle, de certain mouuement

volontaire. Aussi si en quelque grande jointure il survient avec vlcere luxation ou dislocation, si nous essayons à renouer & guarir ladite luxation, incontinent se feront spasmes & conuulsions, qui sont maladies tres-dangereuses. Parquoy faudra pour euiter lescdites conuulsions, vaquer seulement à guarir l'vlcere, & laisser la luxation sans estre guarie. Mais quand és maladies compliquees, n'y a point qui nous presse, ne qui nous tire hors de la cure principale, c'est à dire, de la maladie proposée, nous tiendrons cest ordre, que suivant l'indication de la chose qui empesche le plus la principale cure de ladite maladie, & l'action de nature, nous

guarirons icelle chose la premiere : puis ferons ainsi des autres (si sont plusieurs) tout par cest ordre & par ceste raison , tellement que nulle ne demeurera sans estre guarie. Quant à l'autre demande, que vous faites de la conférence de plusieurs indications , qui s'entrecombatent & sont opposites entre elles , tant des choses naturelles , que contraires & neutres , sçauoir mon comment elles pourront estre suyues & executees en vn mesme temps , il est bon de le vous donner à entendre par exemples : comme si vn homme vieil ayant accoustumé le vin , & pluralité de repas le iour, en sa santé, maintenant estoit malade de fièvre : & que pour le regard de la fièvre , le vin & le man-

ger souuent, luy fust contraire, mais pour consideration de son aage & de sa coustume, luy seroit necessaire: en cecy y a trois indications discordantes & contraires, sçauoir, deux des choses presque naturelles, l'aage & la coustume: vne des choses contre nature, sçauoir, la fièvre. Desquelles de recherches les deux premieres sont conseruatiues: la derniere curatiue. Entre lesquelles y a telle contrariété, que la fièvre refuse le vin & le manger: la vieillesse reiette le manger souuent, & non le vin: la coustume demande le manger & le vin. Et pource que chacune porte sa valeur & son pris, entre elles doit estre faite vne telle commodation, que pour adherer à l'vne, ne faut omettre les autres.

& neantmoins doiuent estre executees toutes en vn mesme temps. La conseruatiue est de plus grand' importance, que la curatiue : il faut doncques lascher quelque chose de la cure de la fieure, donnant au patient le vin & le manger souuent, iacoit qu'ils soient contraires à ladicte cure, pour suruenir & à l'aage, à qui le vin est propre, & conseruer nature en sa coustume : guarissant la fieure par autres moyens, & conseruant lesdites choses en vn mesme temps, s'il est possible : & quand vous y adiousterez l'hyuer, l'indicatió du temps augmentera la permission de manger beaucoup, & de boire du vin. A. Je suis satisfait par cest exemple d'vne partie de ma demande. D. Je vous proposeray

encore vn autre exemple, ſuiuant
voſtre dite demande, lequel ſera
de la conference des indications
opposites, amenees d'un meſme
lieu des choſes naturelles: Il ſe
trouue en la cure d'un vlcere, que
le corps eſt de complexiõ chaude
& humide, comme d'un ieune hõ-
me ſanguin: & au cẽtraire la partie
vlceree eſt de temperature froide
& ſeiche, cõme la ſubſtãce autour
des doigts & des iointures, ou cel-
le qui eſt aupres des oreilles & du
nez, ou quelque autre où n'y a
point de chair, ou bien peu: &
par ainſi on voit que les indica-
tions deſdites complexions ſont
contraires, en la conference d'icel-
les, avec celle de la maladie, pour
iuger ſelon voſtre demande, ſi
on ſe peut accommoder à tou-

tes en vn mesme temps , & lesquelles sont qui tirent à soy la plus grande force de la cure , il est besoin distinguer les degrez de cōbien sont distantes de la mediocrité lesdites temperatures contraires. Car si elles estoient également éloignées de ladite mediocrité , il faudroit appliquer le medicament tel que on feroit en vn corps de temperature mediocre suivant seulement l'indication de la maladie. Mais si elles estoient de inegale distance , celle qui excéderoit l'autre , tireroit à soy la fortification ou mitigation du medicament propre à la maladie : comme nous declarerons au traité de l'usage des indications , en la cure des vlcères. A. Cest exemple merite bien d'estre encore expliqué

pliqué plus clairement : mais il
suffit pour le present au propos de
ma demande. D. Je vous donne-
ray encore vn autre exemple, non
du tout dissemblable à cestuy der-
nier, mais neantmoins qui est
bien selon nostre propos : lequel
exemple est de la conference de
plusieurs indications des choses
naturelles, & presque naturelles,
& d'aucunes contrenaturelles ac-
cordantes ensemble, toutefois
opposites pour la plus grande part
aux indications de la maladie
principale : Vn vlcere sera grand
& profond, doloieux grande-
ment, en vne ieune fille tendre-
te, nourrie delicatement, en vne
partie de son corps de mesme tem-
perature & fort sensible : ledit vl-
cere, tant pour son regard, que

pour la grãdeur & profondeur, requiert medicament plus desiccatif & plus acré : au contraire la douleur, la complexion humide, tant du corps que de la partie, le sexe féminin, l'aage, l'habitude molle du corps, la partie sensible, c'est à dire, le sentiment agu & delicat, la coustume & condition de la personne, qui n'a pas accoustumé le travail, & qui n'endura iama is mal, requierent medicamēt moins desiccatif & plus doux. En cest exemple vous voyez plusieurs indications, tant des choses nouvelles que cōtrenaturelles, qui tirent la cure chacune à soy à l'opposite les vnes des autres. Encore pourray ie amener vn autre exemple vn peu different à cestuy cy. L'ulcere sera en vne partie de cōplexion chaude

en vn esté chaud outre mesure : pour sa part il demande médicament desiccatif: & pour le regard de la complexion de la partie vlcerée, requiert médicament chaud: l'air qui est autour, est trop chaud & trop sec: & pource luy conuiēt médicament froid & moins desiccatif: & tout ce aduient en vn mesme temps. Vous demanderez, auxquelles desdites indications entendrions nous? lesquelles prefererons nous? comment les executerons nous toutes ensemble? Pour toute résolution il n'y a qu'un mot à respondre: Celles qui emportent le plus, & sont de plus grande conséquence, tirent à soy la cure principale, & font le reglement de la medecine, en moderant les autres.